

四庫全書薈要·乾隆御覽本

集部

御定歷代賦彙卷三十四

都邑

廣汴賦

有序

宋李長民

臣竊惟皇宋藝祖受命奠都於大梁於今垂二百載列
聖相承增飾崇麗煌煌乎天子之宅棟宇以來未之有
也昔在元豐中太學生周邦彥嘗草汴都賦奏御神考
遂託國勢之重傳播士林然其所紀述大率略而未備

若乃比歲以來宮室輪奐之美禮樂聲容之華則又有
所未及臣愚不才出入都城十年於茲矣耳目所聞見
亦竊得梗槩輒鼓舞陰陽以鳴國家之盛因改前賦而
推廣焉始則本制作之盛者分方維而第之中以帝室
皇居之奧任賢使能之效而終之以持守冀備一覽之
末為賦曰

有博古先生自下國而遊上京遇大梁公子於路相
與問答傾蓋如故因縱言至於都邑先生乃援古而

證之曰我聞在昔受命帝王繼天而作首定厥都用
植諸夏之根本肇隆億載之規模若乃賁飾恢宏之
美概見於書經管先後之次備載於禮宅中圖大則
有姬公之明訓權宜拓制則自蕭公而經始予不敢
高譚羲皇遠舉夏商試即周而陳之二華對峙八
川交注褒斜隴首之攸屈函谷二嶠之並據此宗
周所都或假山河之險固漢高因之而啓帝祚焉孟
津後達大谷前通導以伊洛澶澗之澤控以成皋廣

武之衝此成周所都適當天地之正中光武因之而成帝功焉畢昴之次河冀之津風俗漸乎虞夏疆域連乎齊秦魏都之爽塏信無倫也衡嶽鎮野龍川帶坳列戈船於三江儲戎車於石城吳都之雄壯信足稱也接壤邛笮通商滇越地蕃竹木之產民厭稻魚之食蜀都之富饒信無敵也凡茲都邑之盛實麗美而爭雄旁睨而論雖辯若炙輶繼日而莫能窮公子聞之始若矐眙已而哂曰先生於古誠博矣孰若

我目覩汴都之偉觀乎顧其所以設險則道德之藩仁
義之垣豈獨依於山川所以建中則皇極在上九疇咸
若豈必宅於河洛其爽塏也有如上帝清都神人五城
軼人寰之塵壒極天下之高明其雄壯也有如勾陳羽
林天兵四拱威震則萬物伏怒刑則四夷竦其富饒也
有如海含地負深厚莫測追魚麗之盛多邁騶虞之蕃
殖彼兩漢之雜霸雖仍乎周家之舊墟三國之鼎峙雖
臨乎一方之都會舉而論之於今日正猶拳石涓水欲

與五嶽四瀆之比擬所謂談何容易先生曰余生長太平和氣中亦既有日而處於蓬茨之下無有遊觀廣覽之益驟來神州恍然自失目雖駭乎闕庭樓觀之麗而未悉其制作之意耳雖熟乎聲明文物之英而未究其禮樂之情予年在英妙博聞強記幸為我索言之公子曰僕寔不敏切聞先進有言昔自唐室不競王綱浸圯陵夷五季紛綸四紀上帝憫斯民之塗炭眷求一人作之君師肆我藝祖應天順人出御昌期若時衆大之居

寔古大梁之域在漢則郡以陳留而命名在唐則軍以
宣武而分額考其地望雖卓犖乎諸夏而川流休氣猶
盤礴而鬱積時乎有待世孰能測洎梁祖之有作始建
都而畫圻匪梁人之能謀天實啟之匪天私於有梁實
兆宋基觀夫分野之次舍則房心騰其輝實沉寄其曜
仰星躔之有赫直皇居而久照察夫土脈之豐衍則高
者磊砢下者墳壚廓坡陀之塏澤極灌溉之膏腴語地
形之高兮則自泗而西涉川上歷濰陽遂東至於通津

岡阜隱鱗煙雲飛屯其上鬱律勢與天連語汴渠之駛
兮則自鞏而東達時門抵宣澤障洪河之濁流導溫洛
之和液中貫都城偃若雲霓沂湍悍而不窮上接雲漢
之無倪語雉堞之固則偉拔金墉繚以湯池仰憲太微
之象屹臨赤縣之畿語郊闈之壯則密拱中宸高映四
野揭華榜以干霄謹嚴更而警夜維是都之建也雖自
於梁逮藝祖而始興至高宗而浸昌列聖相承洎於今
日當國家之間暇肆乘時而增葺遂跨三都越兩京擬

二周而抗衡數其南則神霄之府上應南極偉殊祥之
創見恍惚微妙之難測歲在丁酉大闡真機用端命於玉
帝而彰信於羣黎爰設定命之符妙以蟲魚之篆繼乾
元之用九參八寶而垂範乃嚴像設祇奉茲宮儼一殿
以居上總諸天而位中靈地上嬪列於西仙伯天輔列
於東諤諤羣卿莪冠景從往往名在丹臺而身為世輔
像圖孔肖後先攸序闢金堂啓玉室駭寶輪之飛動森
鸞仗之紛飾其側乃有元命之殿實總位於衆福本始

載叶歲禮惟穆罄華封請祝之誠效天保無疆之卜若
其陽德之建成秩火神於赫熒惑厥位惟尊次日大火
時謂大辰配曰闕伯以序而陳原夫帝業之創自於宋
地蓋乘是德而王天下飾之靈鉦赤文婀娜舉以示衆
遂定區夏豈必赤伏合信於鄔南之亭豈必神母告符
於豐西之夜主上承紀奉祀致嚴審辰出戌入之度有
視慈禮明之占遂維五帝之象夏體重離而面南諧祉
聲於樂府驗朱草於靈篇火得其性景貺昭然瞻彼煌

煌位在南端歷太微以受制避心星而載還相我昌運
於千萬年出南薰望泰壇隱若天高渾若天圓欽崇於
茲僉曰稱焉先是有司循國舊貫明宮齋廬悉取繒縵
後洎紹聖端誠攸建精意孔昭禮文彌粲主上改元之
初載辛巳長至始親郊見逮至癸巳之歲蓋四舉茲禮
矣申敕春官益嚴祀事於是規法三代祭器肇新躬秉
玄圭天道是循百官顯相齋戒惟寅帝登玉輅皇衢載
遵已而日景晏溫天真降臨衣冠幢節之輝映綵仗輦

輅之參差豈徒若見於渭陽而接拜於天門仰重瞳之
四矚聳羣目而動心乃闡琳館揭號迎真用伸昭報以
福斯民度玉津抵天田王者之藉厥畝惟千上春展事
務崇吉蠲於時農祥晨正東作是先載黛耜於玉輅啟
雲幄於紺壇蔥騶馴服於廣阼之側青旗掩靄於黃麾
之間帝御思文飭躬禱專屈帝尊以秉耒動天步而降
軒三推告畢貴賤以班遂播青箱之嘉種以成高廩之
豐年然後穫之程程瑞禾是導郊廟明堂之大享親奉

染盛以致告豈惟率天下之農而敦本蓋時勸天下之
養而致孝層臺宕堯上觀昭回厥基孔固下鎮地維儀
象一新於焉具設上下互映俯仰並察天體斯著辰曜
斯列鼇雲上承金蚪四匝察璿璣玉衡之制兼馮相保章
之法陋靈臺銅渾之規斥周髀宣夜之說於以觀星則
進退伏見不失於正於以觀雲則分至啓閉各得其應
以候鐘律則清濁之均協以候晷景則長短之度稱遂
與天地合其德日月合其明休徵既効叢祥並膺至若

祕書之建典籍是藏法西崑之玉府萃東壁之餘光凡
微言大義之淵源祕錄幽經之浩博貫九流包七略四
部星分萬卷綺錯犀軸牙籤輝耀有燦金匱石室載嚴
封鑰或資討論則分隸於三館或備奏御則會粹於祕
閣以至字畫所傳則妙極六書巧窮八體有龜文鳥蹟
之象有鳳翥龍騰之勢真偽既辨衆美斯備圖畫所載
則三祖餘範七聖妙跡列名馬於曹韓覽古松於韋畢
繫絕藝之入神駭衆觀而動色肇建古文宏璉豐敞擇

一時之英髦命於焉而涵養天下歆豔不啻登瀛洲而
隱藏室名卿鉅公由此塗出若夫龍津所在大闢賢關
作庇寒士今踰百年勒豐碑以正文字之訛建華構以
閣載籍之傳其中則鼎新大成之庭寅奉宣聖之祀象
肖尼山制侔闕里其配享也惟顏孟之亞聖其從祀也
多鄒魯之儒士儼威儀之若存肅衣裳而有偉至於庠
序學校之教也首善於京自熙豐始乃詳備講說謹嚴
課誦規繩以勵其行舍選以作其氣發揮詩書之奧頓

革聲律之敝爾乃采芑新田育莪中泚人材於此乎輩
出聖道因之而不墜其西則用建原廟近倣元豐評圖
程度罔或不同朱薨相望而特起縹垣對峙而比崇界
以馳道之廣臨乎魏闕之雄祥煙瑞靄煥爛蒙龍大明
以奉神考重光以奉哲宗父子之親彌篤兄弟之義彌
隆屆四孟之改律感節物於春冬愴衣冠之出游軫羹
牆於帝衷既進祠於東宮之七殿御潔誠以致恭想睟
容之如在備享獻而肅雖參以時王之禮肆浸盛乎威

容飭茲惟謹稽首拜顙牙盤或薦玉饌惟充有飶其香
齋誠默通顧靈心之響答宜福祚之延洪乃若中臺所
寄衆務泉藪象應乎文昌運侔乎北斗四方利害於是
乎上達二省政令於是乎下究爰即西南亢爽之所度
宏基而易舊太社為之嚮西掖直其後形勝潭潭不侈
不陋列屋前分是為六部自吏洎工位於左自戶洎刑
位於右公庭肅若百吏輻輳於是糾以虞舜黜陟之公
輔以周公訓迪之忠黜胥不能措其姦慢吏不能逃其

責秩秩乎天地四時之聯各率屬而分職有倫有要有
典有則用能效臂指之相應總紀綱而並飭至如天府
之雄統以京尹民物浩穰於三輔之墟聚邑列布於千
里之軫風俗樞機教化原本當府庭之既徙肇分曹而
務謹職業斯勵名實斯允爰擇撥煩之才俾長治於爾
寮南司之俗坐革循訟之積弊原廟之近人無筮楚之
喧囂遭承平之日久匪彈壓之是務皇仁如天萬物覆
露矧茲輦轂之下日薰陶而厭飫不得已而用刑每哀

矜於桔拳日無滯訟歲無留獄貫索之象既虛園扉之
草斯鞠巍巍乎帝王之極功頌聲作而民和睦爾乃背
宜秋出城阿神池靈沼相直匪賒象苑囿之非一聚衆
芳而駢羅神木千歲而不雕仙卉四時而常花宗生族
茂厥類實多當青鳥之司扉開條風之妍暖命嗇夫而
啟禁縱都人而游覽吾皇踐祚之五載六飛始御於苑
門蓋將順民心之所樂達餘陽於暮春指金明而駐蹕
觀曼衍之星陳蘭橈飛動綵仗繽紛帝曰斯樂予何敢

專遂踐瓊林宴寶津零湛露於九重均禊飲於羣臣先
朝之遵故事張大侯以示民於以戒不虞於平世勵武
志而彌勤其北則營壇再成亶為方丘疇柔祇之歆饗
故坤輿之是侔考一代合祭之失實千載循襲之尤敦
牂比至曠典聿修帝躬臨乎澤中即陰位而類求配以
烈祖之尊侑以嶽瀆之儔乃奠黃琮震於神休乃奏函
鐘格彼至幽澄宿氛而不雨暢協氣以橫流顧瞻空際
密邇靈旂有持戈者有執戟者有質若獸者有喙若鳥

者地之百靈祕怪感帝德而來游景光為之燭曜祥雲
為之飛浮侍衛駭愕莫測其由哀時之對上軌成周豈
若漢祠后皇徒歌乎物發冀州至其棣萼之庭建蓋示
優於同氣主上欽承永泰之基益隆則友之義兢兢業
業欲偕追述之志永紹裕陵垂法萬世載因心以撫存
肆匹休於棠棣爵以真王之封陟以上公之位褒以兩
鎮之節厚以三錢之賜俾遂安其居宇咸克保乎富貴
何愧建初歲之入豐也每歲時之行樂儼鴈齒而密侍

和樂且湛靡拘堂陞笑言之適無間勸侑之勤有繼飲
酒之飲既翕既醉何愧花萼之盛也乙未之春龍翔效
瑞脊令來集數以萬計嘉首尾之胥應感昆弟之是類
灑宸翰以體物用闡明乎至意若乃帝假有家明內齊
外自天申命本支昌熾考祥羆之應夢演慶源而毓粹
藹螽斯蟄蟄之衆假樂皇皇之懿受祉而施於孫子既
侔乎周王多男而授之職又合乎堯帝肇正元嗣於春
宮申眷後王而加惠冠禮薦行三加攸次詔以成人之

道載隆出閣之制卜吉壤以圖居惟宮隅之是邇標著
行之美名彰我家之盛事顧起處之獲寧信皇慈之曲
被於此賓師友簡僚吏習禮節講儒藝日奉朝著克勤
無怠拳拳乎上承忠孝之訓而臣子之義備至若宗正
著錄枝派實繁上及曾高下及曾玄分宅廣睦恩義兩
敦第族屬之踈戚班秩祿以惟均遠則褒崇藝祖之胄
近則加厚濮邸之孫配天其澤同姓志沾歌湛露詠行
葦戒杜鄙葛藟考親親於伐木繼振振於麟趾於赫

帝命屬籍是典皇宗取則率遵繩檢歲月薰陶朝夕漸
染藹藹賓興之才擢儒科而登仕版時則有清靜如辟
疆忠精如更生文若東阿勇若任城莫不激昂自奮騰
實飛聲於是參親踈而兩用冀羽儀於王國遂壯周家
之藩屏固漢宗之磐石若夫由朱雀以縱觀下天漢而
北望千門萬戶併將有伉言觀其陽則仍宣德之舊稱
定五門而改創其始也憲娠紫摹大壯揆吉日命大匠
庶民子來則靡煩於鼙鼓瓌材山積則又疑於神貺其

上則藻色麗乎方井雲氣萃乎修楣躍水波乎柏棟列
繡文於蘭栢罔不隨色象類因木生姿窮竒極妙豈人
能為若有鬼神異物陰來相之其旁則檐牙高張欄楯
周布往往雕鸞刻鳳盤獸伏虎或連拳欲立或猛據若
怒或奮翼東廂或圍首西序殊形詭制見者內怖於以
自中夏而布德總八方而為極披路三條則桎栝森以
相連立觀兩隅則呆愚儼以並飾善頌落成上下用懌
言觀其陰則堯堯北闕時謂景龍於焉採民謠於焉觀

民風閎夫闐闐則九市之富百廛之雄越商海賈朝盈
夕充乃有犀象珠玉之珍刀布帛貨之通冠帶衣履之
巧魚鹽果蓏之豐貨遷化居射利無窮覽夫康衢則四
通五達連騎方軌青槐夏蔭紅塵畫墻乃有天姬之館
后戚之里公卿大臣之府王侯將相之第扶宮夾道若
北辰之蕃衛太平既久民俗熙熙徒觀夫仙倡效伎佞
童逞材或尋橦走索戲豹舞罷則觀者為之目眩或鏗
金擊石吹竹彈絲則聽者為之意迷亦有蜀中清醪洛

下黃醅蒲萄汎觴竹葉傾巵羌既醉而飽德謂帝力何
有於我哉瞻彼艮維肇崇琳闕始真天祥昉分彪列妙
道由是聿興至教於是旁達辛卯之夢既符壬辰之運
斯協外則立仁濟輔正之亭行玉筭考名之法博施於
民俾絕天關神符一出羣邪四讐馘毒治病功深效捷
內則艮嶽屹以神秀介亭聳以巖業天人交際之夕清
供於此備設俄而玉笋自傾寶劔如掣駭雷霆之轟轟
靈囿下兮雜還逮夫應鍾紀律里社開祥凡預臣子之

列欲傾頌禱之誠即茲宮以效報期萬壽之無疆於時
演大梵希夷之旨諷太玄空洞之經遂頒祕錄八百聯
名猗彼乾維龍德是營地直天奧上鬱化清有岡連嶺
屬之勢有龍盟虎踞之形儲休發祥繫我聖明惟崇飾
之彌麗正土木之夸矜蓋示不忘其所自為萬世之式
程彼漢之代邸既瑣瑣焉唐之興慶又奚足稱爰有瑤
池波湛翠水淵渟峨方壺起蓬瀛大君戾止廣殿歡騰
九奏備八佾成凡左右侍宴者恍若躡神山而遊紫清

戊戌之冬太一次於黃祕之廷其位在西北則臨乎是
宮之地於辰為闈茂適契於元命之晶詔鳩工以基迹
用揭虔而妥靈十神載別五福來寧至於端闈之內大
慶眈眈路寢斯在有大符貺於此乎躬受有大祭祀於
此而齋戒日精東承月華西對重軒三階翕絕動彩左
城右平相與映帶晚靈光猶培塿晞景福之叢芮春王
三月履端匪懈庭燎有光禁漏斯艾供張既盛法物咸
萃乃建招搖歛以環合蒲牢發乎輕蓋正宁當陽天極

是配九賓星拱垂紳委佩樂奏乾安間以韜韎上公薦
壽捧觴跪拜天子萬世兆民永賴其左則合宮之制高
出百王上圓下方法象乎天地九筵五室經緯乎陰陽
旋四序之和於四阿達八風之氣於八窓淵衷默定聖
畫允臧重屋告成光我家邦於以饗帝而饗親則日卜
上辛時丁肅霜樂調黃鍾享維牛羊爰熙太室恭薦馨
香肆推尊於神考用嚴配於上蒼於以視朔而布政則
春朝青陽秋覲總章冬遇平朔夏宗明堂玉冊以極其

變內經以考其常欽授於人遂正天綱其右則薇調之
閣凝嚴密靜神鼎內藏天所保定侔郊郛之永固筭甘
泉之匪稱其始禱也窮制作之妙於繫表得隱逸之士
於草茅一鑄而就光應孔昭其始定也夜出九成不吳
不敖龍變光潤氣明煙消惟鼎尊之重作鎮神皋數極
九變彖該六爻屹然中峙增崇廟朝曰蒼曰彤以奠齊
楚之域曰晶曰寶以奠秦趙之郊有位東南有位西南
者有位東北有位西北者分方命祭罔或不調宜乎卜

世卜年過於周歷永保茲器與天無極至其內朝則祥

曦延和清穆顧問親臣侍列禁衛彌慶治朝則紫宸垂

拱丹青有煥一日萬機此為聽斷厥或進拜將相號令

華夷爰即文德播告惟宜燕樂羣臣詳延多士乃御集

英以時歲事又有龍圖天章寶文顯謨以洎徽猷五閣

渠渠奉祖宗之彛訓示子孫之楷模言追盤詰道契圖

書繫祕藏之靡怠仰聖孝之如初次則東西分臺政事

所會始揆而議則可否有著龜之決既審而行則出納

擅喉舌之寄於以幹旋鈞軸輔成至治其在西樞掌武
之度則有將印之重軍符之嚴爾乃運籌帷幄之中折
衝樽俎之間爰戢五兵坐鎮百蠻其在翰苑摛文之地
則惟密旨是承德意是導爾乃覃恩潤色追風渾灑遂
繼東里之才允符內相之號乃若天子燕息之所也宣
和祕殿翬飛跂翼憲睿思之始謀因紹聖之故跡凝芳
瓊蘭重熙環碧輪焉奐焉光動兩側聽政之暇來游來
息搜古制於鼎彝縱多能於翰墨致一凝神優入聖域

爰命邇臣於焉寓直罄啓沃之丹誠庶密效乎禋並申
紹紀元昭示萬億視彼元狩元鼎神爵五鳳之號詎能
專美於史冊至如后妃親蠶之所也延福邃深有嚴金
鋪當春日之載陽率六宮而與俱懿筐既飾柔桑既敷
鞠衣東嚮三採躊躇風戾川浴地溫氣舒然後龍精報
貺瑞繭紛如五色之絲允侔乎東海八蠶之繇倍富於
吳都爰獻天子祭服所須由此率先天下則無數之化
斯並美於闕雎以至掖門曲榭之奧周廬徼道之肅長

廊廣廡之連延珍臺閒館之重複倬然在列璇題輝映
雖使廣延墨客衆集畫史曷足以紀茲區宇之盛先生
聞而稱贊曰汴都之美其若是乎抑何修何飾而臻此
乎公子曰主上以神明資才受天眷命為天下君其所
以圖回宰制獨運榘矱之中者愚不得而測也切仰廟
堂之所先務者任賢使能而已試為子陳之若夫十室
之邑必有忠信天下至廣豈曰乏才觀夫燕趙汝穎之
奇勾吳於越之秀兩蜀文雅三齊質厚以至關東舊相

之家山西名將之胄感會風雲雜然入彀茲神聖之都
是為英俊之躔元精於此回復間氣於此蜿蜒以言乎
儒風則長者之稱自漢而著以言乎世族則文士之盛
自晉而傳隱逸有夷門之操文章出濰渙之間帝賚獄
降運符半干商弼周翰接武差肩陋七相五公之絃冕
邁杜陵韋曲之衣冠譬猶倣儻權竒素多於冀野璵璠
結綠自富於荆山上乃以道觀能兼收並取明明在公
濟濟列布同寅協恭相與修輔故得朝廷清明紀綱振

舉威武紛紜聲教布濩東漸鴨綠南洎銅柱深極沙漠
遠踰羌虜陸龍警水懷奔走来慕雕題反趾左衽辮髮之
俗願_詣裝於華風金革玉樸犀珠象齒之貢願獻於御府
於斯時也治定而五禮具焉則採周官之儀物稽曲臺
之典故考吉禮嘉禮之義正婚禮冠禮之序車輿旂常
衣冠服制職在太常各有攸叙功成而六樂舉焉則詔
后夔辨舞行命伶倫定律呂法太始五運之先諧中正
五均之度笙鏞鞀磬琴瑟祝敔職在大晟各有攸部衆

制備羣音叶天地應神人悅修青效珍應圖合牒上則
膏露降德星明祥風至甘雨零下則嘉禾興朱草生醴
泉流濁河清一角五趾之獸為時而出殊本連理之木
感氣而榮嘉林六目之龜來游於沼芝田千歲之鶴下
集於庭期應召至不可殫形是宜登泰山躡梁甫泥金
檢玉誕揚丕矩奏功皇天登三成五上猶謙挹而未俞
也於是親事法官之中齊心大庭之館思所以持盈守
成垂萬世之彛憲躬執道樞卓然獨斷仰以順天時俯

以從人願規模則惟寧人之指是循政事則惟元豐所
行是續其在官也絕僥倖之路汰冗濫之員奏詔者戒
於倚法治民者戒於為姦其在士也納讜言於羣試復
科舉於四遠保桑梓者遂孝養之心在流寓者獲游學
之便其在民也除苛濫之科蠲不急之務農人服田以
效力穡之勤父老扶杖以聽詔書之布將使四海之內
反樸還淳背偽棄末皞皞乎太古之風各安居而樂業
先生聞之歎美不暇乃謂公子曰今日治效如此正臣

子歌功頌德之秋也固惟踈遠之蹤名不通於朝籍雖
欲抽思騁辭作為聲詩少述區區之志君門九重難以
自達則乙夜之覽何敢冀哉因擊節而歌曰麗哉神曜
位九重仁天普被四海同曠然丕變還淳風金革不用
囹圄空千齡亨運今適逢下七制卑三宗微臣鼓腹康
衢中日逐兒童歌帝功歌畢振衣而去公子遂述其事
而理之以總一賦之義焉理曰赫赫皇宋乘火德兮莫
都大梁作民極兮一祖六宗世增飾兮光明神麗觀萬

國兮穆穆大君天所子兮粵自叢霄履帝位兮體道用
神妙莫名兮立政造事亶有成兮金鼎奠邦神姦讎兮
玉鎮定命垂奕葉兮天地並應符瑞著兮應圖合牒千
百禩兮坐以受之開明堂兮三靈悅豫頌聲興兮元臣
碩輔侍帝旁兮相與弼亮守太平兮連丁壬辰化道行
兮已酉復元寶歷昌兮天子萬年躬在宥兮斯民永賴
躋仁壽兮

南都賦

有序

宋

王仲粦

洛陽王仲勇侍親客於宋十有餘年矣宋南都也山川
城邑人物風俗禽獸草木博觀而窮覽麇麇得其凡焉因
藉華陽先生渙上公子為問荅以賦辭曰

華陽先生與渙上公子步於西山之隈環於竹圃之左
曰美哉邈乎土地之沃人物之夥也公子喟然歎曰先
生觀斯而已獨不聞往者之事歟上自五帝中接三代
下訖漢唐目擊而可知指陳而可喻請為先生言之於
顯樂國在睢之陽其地則宋其分則房夏豫周青秦碭

漢梁帶以黍丘之野包以闕伯之疆盟豬出其右汲水
更其旁渙穀濊灌膠涑逐黃從橫馳鷲源分派張過乎
隕石之野徑乎龍丘之岡行乎釣臺之渚出乎穀城之
塘上接大河通於銀潢下達渦泗匯於淮湘滂澍舉滙
淼淼洋洋漭漭澆澆滴滴湯湯若乃歷華里經洧陵乘
襄塢陟貫城傍空桐而過沙隨偕鴻口而升橫亭伊高
辛之帝子主大火而修祀鄙葛伯之仇餉猗湯征之攸
始嘉微子之啓封卒繼承於商氏訪桐廬之兩門孰世

遠而難記企蒙城之故邑懷漆園之傲吏登北岡而遠
瞰想橋公之德懿銘三鼎而征鉞曾餘光之未墜仰子
喬之颯馭世獨尚其丘墳臨繪水而徙倚誦相如之高
文閱雙廟之靈宇欽張許之威神忠義煥乎日月世彌
久而逾新英風激乎萬代如想見乎其人觀山川人物
之舊纔得其凡而略之僕固未能詳也若宮室苑囿之
盛池沼臺榭之廣侈靡誇前光輝絕後惟梁孝王有足
稱者僕願繼其說而先生自覽其切焉漢有天下至文

而昌九族敦序帝室以光乃命子武俾侯於梁惟梁大
國城四十餘北限泰山之險西界高陽之墟禦備東南
則九州之奧區焉廣衍沃壤則天下之膏腴焉於是舍
大梁之故土卜睢陽之新都傍溲城而連屬起閣道以
縈紆外廣池洫內經郭郭陋九筵與百堵法上國之規
模發小鼓以始倡下節杵而和之流樂府以度曲豈餘
音之獨遺於是乃作曜華之宮儼阿房與林光鬱正殿
之嵒嶼巍然起乎中央散彤彩而澔泔復煒煒以煌煌

驚蚪龍於金楹乍矯首以騰驤軒鸞者翥於飛甍欲乘風
而下翔歷太階之寶砌駢璧瑛與玉璫光陸離而眩目
足幾往而徜徉旁有曲室後連洞房竄窳窈窕仰不見
陽列方疏而散綺玉女睨而悠颺又有宴間之館寔曰
忘憂文章瀨博卓犖瑰奇者萃乎其中貢以文鹿白鶴
參以淥郵細柳間以連璋沓璧綴以清管弱絲東苑望
園三百餘里鵠鷓鷯山鵲野雉守狗戴勝鷓鴣翡翠
聲音相聞翱翔往來萬端鱗萃不可勝紀其木則檉松

楸栲楸梧柘檀欖檀木蘭栢櫚豫章華楓翠槐古檜朱
楊雲封霧鎖臨谷被罔其果則榼梨櫟栗素柰朱櫻紫
棗來禽吳橘楚橙其草則蕙若蘭菹薜蕪蓀龍杜衡芹
賞江離芎窮庭蕉聳綠階藥翻紅糝以忘憂合歡之嘉
植雜以避暑延壽之芳叢芬芬馥馥蒙蒙芄芄其竹則
簣簣籥篔簹箬筍翁筠箬簞疎篁密篠布隴夾池檀藥翁草
婀娜陸離露滋雪映風靡雲披於是乎複道連緜亘數千
步飛閣層樓動以百數一望平臺與離宮眇眇忘其何

所中有百靈煙嵐竒秀表以落猿之巖環以棲龍之岫
既盤紆以第鬱亦映帶其左右面百尺之深潭瀨鳴玉
之清溜升望秦之峻嶺懷故關而回首維彼螽臺在城
之西勢千仞而崛起豈終日之可躋攀未半而神悸意
欲下而復迷驚斗杓之頻逼頽霓鬣之下垂疑真仙之
攸館非人寰之所棲屹清冷之對峙復偃蹇以穹隆上
憑范檻之崢嶸恍忽不知其幾重下瞰清淵之澄澈金
碧倒影乎其中旁接鴈池綠淨漪連秋浪漲雨春波拍

天鶴洲背其後鳧渚面其前棹女謳而蕩槳漁人集而
叩舷水禽則有鴈鷓鴣鴛鴦鷺鷥鷓鴣子鵠侶鴻
傳翔翔翻翻載沉載浮既瀼潑而隨波暫飛鳴而驚舟
水草則有蘆葦蘋莞葦葭蒲蔣白蘋綠荇芡實蓮房雨
濯榦而增綠風披華而吐芳王臨是國綽有餘閒思遊
東苑縱獵乎其間於是乘雕玉之輿馴黃裏之馬紛萬
騎之徒騫千乘之駕服太阿之雄劍靡彩虹之珠旂鳴
和鸞以玲瓏翳羽蓋以葳蕤安國奉轡嚴忌附輿扈從

橫出並山之隅左許少右專諸依岡為冢因川為漁奮
駭百獸雷激雷驅搃雄螭楚豪豬轉犀犛犇麇麋游
蟻躡駟騷矢不安發應聲而殊鋌不虛擲洞窟穿謁山
殫谷盡子然無餘於是梁王弭節而還容與委蛇徘徊
往來其樂未衰相與賓客復遊於鴈鶩之池登龍檻飛
鳳蓋釣錦鱗出文貝弋白鷗挂黃鶴鷓鴣下鸕鶿落薄
暮日斜俛仰極樂獲獸之多弋禽之衆子虛之所遺西
賓之所略也馳騁少怠明日乃燕於平臺名相如延鄒

枚綺席列雕屏開膾脍脍炙豹胎酌金漿之酌觴縹玉
之酌吹紫鳳之簫擊靈鼉之鼓聆遼溟之歌睇巴渝之
舞又有邯鄲曼姬燕代麗女輕祛靚粧綽約媚嫵明眸
微睨色授神予於是衆客皆醉頽然忘歸浩歌起舞獻
壽考無疆之詩曰君王淵穆德日躋間暇遊宴樂無涯
願千秋兮萬歲常與日月爭光輝先生曰噫公子何謂
茲邪若公子所謂重耳而輕目榮古而陋今膠以人物
之陳迹炫以山川之舊經又烏覩大宋之盛乎夫大宋

之開基也肇自商丘大啓土宇創洪圖而遺億代一帝
統而超邃古萬國被德澤四裔暢皇武西盪巴蜀東澹
海濬北指幽薊南曜朱垠天乙七十里而興王姬周三
十世而卜宅曾何足云至於祥符之際累盛而重熙增
泰山之高禪梁父之基神祇安妥日星光輝寶符瑞應
萃乎斯時於是巡方寓幸亳社動天輅備法駕海夷獻
珍黃雲覆野就見百年存問鰥寡明壹法度赦宥天下
當是時也翠華迴馭龍旆載揚迺瞻茲土如歸故鄉觀

紫氣於芒山辨白水於南陽灑翔鸞之神翰披鴻藻之

天章於是建南京陪上國首諸夏作民極對列乎浚郊

相輝乎洛宅頌慶洞闕歸德峻峙若閭闔之特闡連馭

娑與杓指偉宮室之光明仰觚稜之神麗儉不至陋奢

不逾侈旁立原廟歸罪宮崇殿實有三一祖二宗顯文

謨而承武烈彌萬祀而無窮觀其英豪之域冠蓋相望

元勳雋老五姓實昌嚳先生之學舍溢誦聲以洋洋敬

鄭公之碩德仰文正之餘芳俯浪宕之舊渠迴伊洛之

清流醜江吳之漕粟浮寶鷁之千舟若乃昭仁崇禮迴
鸞祥輝連闌帶閣列隧通畿萬商干賈鱗集羽歸星布
織麗山積瑰竒來不可抑往不可羈南獠蠻而東獠豹
紛大貝與明璣其軍旅則棘門細柳連總百營馭以驍
將厲以犀兵時以蒐獮之祭陣以魚麗之形扼一都之
衝會耀萬里之天聲其原野則田疇彌望不可計數浸
以曜漁之源被以沃壤之土舉趾即雲荷鋤迺雨芄芄
離離禾麥稷黍其亭館內之則有流觴綠波檜陰四合

照碧妙峰武備道接外之則有朝雨暮雲暖風殘月又有
玉觸金縷光華姝喜嘶馬落帆芳草柳枝之列聯觀光與
望雲指中天之魏闕其池沼則東西二湖淠淠迢迢水澄
似鏡波泛如潮窺馴鷺於別渚識海雁於舊橋爾乃金
魚分籥玉麟剖符輔弼耆德侍從鴻儒鎮撫東土保釐此
都視先王之遺民愛風俗之安舒乘剽繁之多裕覺坐嘯
而有餘陟高臺而環望悟神意之自如臨綠水而暫止宜
放曠於江湖若予之所舉僅知其髣髴十分未得其一

隅吾子徒聞孝王之遺風舊迹不覩大宋之豐功偉烈也徒
詫梁國故墟之名不知藝祖興王之實也徒誇兔園之大鴈
沼之廣不識原廟之尊帝宮之美也曜華故基鞠為茂草
孰若都城佳氣鬱與雲翔諸侯僭上游宴無度孰若天子
巡狩動靜有常珍怪之玩竒木異卉孰若農夫之慶黍稷
稻粱先生之言未終公子矍然若驚惘然若醒茫然若有
所失者既而幡然改曰鄙哉予乎嗟予舍近而取遠習迷
而遂非其亦久矣先生博我以皇道宏我以王圻使數十

年所眩曜釋焉無疑僕雖不敏請終身而誦之先生
於是作歌以遺焉其辭曰翼翼神都皇祖起焉煌煌魏
闕真人巡焉有睟其容三殿位焉於萬斯年天子明焉

王畿千里賦

宋

宋祁

王有一統人無異歸中四方而正位畫千里以為畿總
大衆之莫居式昭民極據方來而處要以重皇威二代
而還維周有制肇庶績以圖大廓多方而為衛作我上
國垂諸永世以謂地非中夏無以示天子之常尊土不

一圻無以待諸侯之入計爾乃測圭於地考極於天風
雨之所交者道里之必均焉郊野錯而迴合鄉遂巨而
蟬聯溝封斯萬疆場且千差籍九畿定夫家於都鄙出
車萬乘括賦入於原田是謂辨方且非期侈廓焉天府
之國魏乎王者之里爵祿命賜之供億朝覲會同之底
止不偏陋以取侮不夸矜而侈美侔江海之重潤乃據
上游法日月之徑圍用張天紀且其蠻夷面內玉帛駸
奔內則百官承式外則四國于蕃化之遠者禮益廣歸

之衆者務愈繁必在制廣輪於有截示極摯於羣元倍
十子男大有由而御小任包旬稍卑不得以侔尊亦由
天之高博物而無外地之厚廣生而咸賴使高而可度
則寥廓何仰厚而易知則沉潛有害是用控天下以咸
又極宸居而稱大詩美四方之是則理乃同歸史稱後
世之無加事誠胥會美夫周原膺膺禹畫茫茫或處瘠
為教或建瓴是防然皆按成事於神甸跡前謀於令王
所以漢相論都首識金城之廣召公相宅前知墨食之

祥洪惟我朝奄有方國託宏基於天地亘長藩於道德
所以申畫邦畿是用守之無極

皇畿賦

宋楊侃

有賦家者流欲馳名於當世思著詠於神州忽念前古
深懷景慕誦二京於張衡覽兩都於班固於是輟卷意
慙閣筆心伏讓而謂臣請書簡牘臣辭不獲已而謂之
曰予讀二子之賦而知兩漢都邑之制宮殿之麗而未
知大宋畿甸之美政化之始也予幸得職采風謠官參

儒雅千里之郊圻是巡八使之輶車斯假若夫大邑名城神皋沃野畫地可記濡毫可寫至於宮禁之深嚴予未聞也都城之浩穰衆所覩也是故彼述其內子言其外蓋萬分之舉一難盡述而備載昔者唐綱不振國鼎將遷俄梁室之革命啓浚都而應天既觀法於左峭右隴亦取則於西澗東瀍大矣雄圖昭然聖謨謂陳留天下之衝要謂大梁海內之膏腴漢祖得之則齊楚之敵敗亡相繼咸就擒而即誅梁王守之則七國之師不敢

西向盡為馘而為俘實王氣之長在宜萬世而作都也

莫不廣封溝設險固襄平割宋之美田戴邑裂曹之沃
土滑分屬邑之二城陳滅太康之萬戶潁川之鄆陵扶
溝滎陽之中牟陽武咸命落編氓於州籍升地圖於天
府故得雄臨九州陋視三輔經營歷於五代法則垂於
萬古皇宋之受命也太祖以神武獨斷太宗以聖文誕
敷平江表破蜀都下南越來東吳北定并汾南取荆湖
是故七國之雄軍諸侯之陪臣隨其王公與其士民小

者十郡之衆大者百州之人莫不去其鄉黨率彼宗親
盡徙家於上國何懷土之不聞甲第星羅比屋鱗次坊
無廣巷市不通騎於是出居王畿挂戶縣籍興屋樹
業出賦供役者矣豈比夫秦選戶口於咸陽漢徙豪傑
於陵邑魏將實於河南驅冀民而是人也今聖上之在
東宮也尊以皇儲尹茲京邑視政之初民訟雲集莫不
察之以情偽辨之以曲直發伏禁姦親剗繁劇既而桴
鼓不鳴豪右斂迹吏不敢欺民用懷德若乃龍樓曉出

奉法謹身教民以事父也親拜師傅降禮國儲教民以
事師也公退則侍講在前出入則四賓是翼尚老尊學
與民為則是時皇畿之內易俗移風以至正南面居域
中由內及外化行令從是君上德惠素立而政教早崇
也若乃銳旅百營高城千雉孫武教陣吳起撫士其齊
如林其猛如虎手擊利劍足張彊弩躍馬奪槩投石拔
距入則訓練出無征戰身閒賞厚家有餘羨是故擁彊
兵衛近甸如大郡雄藩為屏為翰者且有九縣天設二

渠曰蔡曰汴通江會海縈畿帶甸千倉是興萬庾是建
杜預主計劉晏司漕何貢何輸吳粳楚稻月致百萬猶
責其少漢之太倉積粟紅腐使彼粒而計之未及我斗
量之數成王之庾萬箱以供未若我千艘往來運江淮
而無窮是故備九年之儲充六軍之給當津處要山積
雲入者復有五邑若乃總戎者貴領專城宰邑者上應
列星簿既資高尉亦秩清率兵守戍者五鎮統騎分巡
者兩路城隍之外遊徼四布桓桓八臣是警是護郊原

靡靡春草萋萋邊烽不警牧馬爭嘶殿空萬壑野散千
蹄陂間牧南沙平走西一飲空川一甌空原去如霧散
來若雲連地廣馬多古未有焉若乃任土出於民心獻
芹比於古俗園茄早實時果先熟瓜重南門笋宜修竹
鬻於市兮利既兼倍進於君兮恩必需沐時或戴勝降
桑螵蛸未鳴野人登麥以先至蠶婦貢絲而已成別有
襄陵之桃楊夏之柿朱櫻宜於谷林丹杏出於尉氏其
或陽鄉千樹之梨扶樂千樹之栗比封千戶之侯亦何

讓於昔日鹹壤宜北鄉之羊野莎美東邑之豕魚鼈鳧
鴈之盛西有陂兮萬頃菱芡蓮藕之美東沿堤兮百里
其或仲冬之月禮尚進鮮介麋素出於蓬澤狡兔復多
於澤園乃命菜田於虞人選徒於司馬四校畢陳六飛
夙駕何千乘萬騎之馳騁滿四通五達之郊野西或過
於圃田之藪東或出於平臺之下乃有孟賁之徒烏獲
之類禮謁而來叱咤而至搏虎兕擊熊豕玄豹逆曳白
狐生致復有負羽從獵之人控弦伏獸之士落孤鴈於

馬首貫雙鵬於雲裏然猶示之以三驅之仁寬之以一
面之網不使獸殫於下禽盡於上何長楊之獵自謂於
禽多雲夢之畋敢誇其地廣哉圖書載詳境土斯見開
封則漢志之名邑今二赤之首冠祥符則天書之降年
易新名於舊縣穗秸之入斯為近甸若乃百萬衆之分
營十二市之環城囂然朝夕異彼郊坰其東則有汴水
之陽宜春之苑向日而亭臺最麗迎郊而氣候先暖鶯
轉何早花開不晚瞻太一之清宮壯先朝之命工構宇

煙霞之外出俗囂塵之中效仙人之樓居慕老氏之玄
風青青道邊千畝何田端拱之初藉於此焉儻耜一執
青史千年登蓼隄以東望見高臺之百尺居道之南在
岡之北下有廣場可馳可逐我皇帝初即寶位大閱軍
旅親乘戎輅習戰於此士馬秋勁甲冑晨整止憑軾以
將觀衆無譁而是聽列八陣之形申三令之語肅將帥
嚴部伍頗牧授之以方略韓彭進之以旗鼓失軍容者
戮以徇衆有勇敢者賞而裂土彼上林之馳射驪山之

講武豈可同日而語哉其南則有崇崇清壇肅肅齋宮
卜是吉土龜從筮從永奉禋祀郊見昊宮燔柴展禮萬
世無窮別有景象仙島園名玉津珍果獻夏竒花進春
百亭千榭林間水濱珍禽貢兮何方怪獸來兮何鄉郊
藪既樂山林是忘則有麒麟含仁騶虞知義神羊一角
之祥靈犀三蹄之瑞狡狴來於天竺馴象貢於交趾孔
雀翡翠白鷗素雉懷籠暮歸呼侶曉去何毛羽之多竒
罄竹素而莫紀也忽斷苑牆又連池籞介族千狀沙禽

萬類盡游泳而往來或浮沉而出處柳籠陰於四岸蓮
飄香於十里屈曲溝畎高低稻畦越卒執手吳牛行泥
霜早刈連春寒種遲春紅粳而花綻簸素粒而雪飛何
江南之野景來輦下以如移雪擁冬苗雨滋夏穗當新
麥以時薦故清蹕而親至輦從千官郊陳萬騎既觀穫
以云罷亦宴犒而後已其西則有池鑿金明波寒水殿
鷓首萬艘而壓浪虹橋一道而通輦太液無濫觴之深
靈沼有潢汙之淺時或薰風微扇晴瀾始暖命樓船之

將軍習昆明之水戰天子乃駐翠華開廣宴憑欄檻於
中流瞰渺茫於四面俄而旗影霞亂陣形星羅萬櫂如
風而倏去千鼓似雷而忽過則有官名欽飛將號伏波
驤江中之龍避船下之戈黃頭之郎既衆文身之卒且
多類蚪龍而似蛟蜃駭鯨鯢而走鼉鼉勢震動於山嶽
聲沸騰於江河別有浮泛傀儡之戲雕刻魚龍之質應
樂鼓舞隨波出沒鑿輿臨賞以盡日士庶縱觀而踰月
波池之南有苑何大既瓊林而是名亦玉輦而是待其

或桂折天庭花開鳳城則必有聞喜之新宴掩杏園之
舊名於是連鑣上苑列席廣筵蓋我朝之盛事為士流
之殊榮一派如飛通漕駕虛越廣汴湍流之上轉王城
西北之隅貫都注御溝之口轉漕通廣濟之渠京索導
源而於彼金水名河而在茲其北則瑞聖新名含芳舊
苑四方異花於是乎見百疇好鳥於是乎聞十洲靄景
三島分春延殿之設是名天駟伐大宛以新求涉渥洼
而遠至羣驅八騎隊數十驥雖輓粟之千軍乃嘗秣之

一費彼沙臺之崔嵬聳佛刹之千尺岡阜連延於西南
原田平坦於東北何沙海之飛揚忽到此而止息莫不
地多賢士代出異人何干旄之子子向浚郊而雲臻雖
梁多於長者非安國而不聞過信陵之祠宇想英風而
若存何侯嬴之白首尚抱闕於夷門遇公子之好賢忽
枉駕而咨詢既同載而過市謁隱屠而駐輪果嘉謀之
斯得救邯鄲而義伸奪晉鄙之十萬終自將而却秦設
守冢而奉祀值漢皇之東巡若乃過陳留之故邑訪地

名之所因蓋二留之分別彼彭城而此陳昔赤帝之起
義會子房而於此始錫賢於上天終受封於茲地既萬
戶以建侯亦千年而崇祀千屯北縣之郭郭三月南河
之鄜市何飛梁之新遷患橫舟之觸柱今之雍丘古曰
杞國民厚風俗土繁貨殖縣之西郊山曰谷林其或花
迎野望煙禁春深景當妍麗俗重登臨移市景日傾城
賞心幄幕蔽野軒蓋成陰暮而忘歸樂不絕音既同歡
於萬室罔惜費於千金厥篚織文出於襄邑池濯錦以

為名蜀有江而焉及復有咸平大縣我宋新建因紀年
以命號詔將作而營繕公宇之制甲於畿甸中有大川
通闌帶闌貫都邑而北來走江湖而南會何容棹之常
喧聚茶商而斯在千舸朝空萬車夕載西出玉關北越
紫塞徵尉氏之名本大夫之邑蓋鄭國之上田俾獄官
而世襲何彼樂郊今為畿地爰有仁木應乎嘉瑞二棠
合生雙榆連理槐獨秀而通枝木異類而同氣良宰畫
圖而來聞大尹飛章而奏異莫不名虎殿之宿儒集麟

閣之名士驗彼祥經考乎信史表六合之一家而帝德
之光被也加以地多藪澤利有蒲魚晴澗望晶陂之色
山水觀惠民之渠乃有檝師炭商交易往復素衣化緇
漆身同色行舟則夏瞻雲雨售貨則冬禱雪霜經宋樓
而關征既薄歷朱曲而市稅有常潺潺洎溝渙渙有水
入鄆陵而碧截原田過扶亭而清耿閭里珍貨奔馬欄
之道豪俠聚建雄之市彼東昏之舊城易美號於新室
似興廢之有時而圖讖之預出何以明而代昏符作讖

於聖日考城之人舊俗剛毅鄉出勇夫里多壯士椎埋
為姦任俠尚氣睚眦必報杯間刃起今為畿民禮東化
被暴虎之徒聞義則畏南阻太康淮陽甚邇地宜琅玕
家有蒼翠城過兩扶溝踰二備地既成於上田人不趨
於末利桑成陰而春繁棗結實而秋美問中年之耆民
歎魯恭之仁宰何三異之善政有千年之遺愛遇我后
之盛明西朝拜於園陵瞻路隅之靈廟想前史之嘉名
祭以上公之禮爵以太師之榮若夫八澤九溝二池三

固周流原野表界境內宿萬勝以遥觀見斗門之雙注
吸驚浪以橫來絕長堤而可懼其始也患彼決溢利其
填闕溉萬頃之陂澤變終古之烏鹵盡若膏腴咸通耒
耜有若決漳灌鄴旁之田鑿涇沃闕內之土然後疏導
入白溝之流會同為漕渠之助彼梁固之在東亦派分
於波勢沿流有一舍之遥則水無寸差之異何一啓而
一閉常若合於符契始注陂而雷聲終入渠而駟逝散
濁浪以澄沙廣良田而濟世指陽武以北遇涉博浪之

長沙岡斷續以千疊塵飛揚而四遮人迷途而莫辨鳥
投樹以何賒策不進兮我馬輪欲埋兮何車過戶牖之
名鄉乃曲逆之舊里何分社之稱平已宰國而有志經
計相之里中思張蒼之善算屈柱史以事秦榮列侯而
佐漢宜二賢之靈祠歷千古而輝煥西望河流經帶二
邑高岸山立回灣箭急蟻壤夏漏衝決莫救基根相扶
萬柳千榆輿梢畚土常設備禦建營置卒轉粟實庾堅
彼金隄鑿乎前古秋防夏扞守以朝暮冬計春修役均

編戶岸蟻連航兵屯兩渡阻浩浩之波坻憧憧之路北
權謳晨南帆落暮惟姦是防非利是務右倚太行橫絕
雲霧夫雍阻二嶠之險洛憑九河之固方之於是彼若
平路過濮水之長渠經封國之舊城寥落兮桐牢之亭
湮沒兮黃池之迹何昔也明誓重重諸侯於此以會同
今也京邑翼翼四方於此以取則涉長垣之塗歷古衛
之境城有婦姑之名人恭孝慈之行嘉孔子之人蒲先
宰予以觀政美大家之東征復農田而發運若乃南瞻

潘里北指蘭岡樹新文於二碑易美號於兩鄉因東封
之行幸感瑞應之非常忽有鶴唳降於穹蒼丹頂未辨
於煙際玉羽已穿於仗旁九其數象君道之體陽再而
降符帝運之重光何德動於上天而道盛於前王也如
是哉客既聞臣之說而知漢以宮室壯麗威四夷宋以
畿甸風化正萬國彼尚侈而務奢此歌道而詠德乃曰
使孟堅可作平子再生讀予之賦不敢復談於漢京也

御定歷代賦彙卷三十四

謹案卷三十三第十頁前五行支馭東方仍俾二
官按唐文粹支馭作友叙仍作乃此從文苑英
華

第十頁後六行間閻之近革按唐文粹近革作舊
識此從文苑英華

卷三十四第七頁前四行察璿璣玉衡之制刊本
脫察字今增

第十頁後七行乃奏函鐘刊本鐘訛中據周禮改

第二十三頁前八行鬱正殿之堞壘刊本壘訛鬱
據文選改



總校官庶吉士臣張能照

校對官編修臣楊壽楠

謄錄監生臣高瑞相

謄錄監生臣莫漢

欽定四庫全書薈要

集部

御定歷代賦彙卷三十五

詳校官候補通政經歷臣郭祚熾

御定歷代賦彙卷三十五

都邑

鎬京賦

元 楊維禎

唯
有
西
都
賓
問
於
北
都
主
人
曰
昔
宗
周
之
經
邑
也
眷
我
西

土實惟作京烝哉武王適觀厥成主人亦嘗聞其說乎
主人曰未也願賓據懷土之素發思古之幽博我以王
道弘我以宗周賓曰唯唯夫姬德之興也始於后稷封

自郃土長於公劉克篤前祐去郃即幽躬服勞苦太王
肇迹艱難岐下國人懷歸從之如雨文王述業有此武
功既伐於崇遂邑於豐武集大統奄有四方遷都卜宅
於昔有光肇造區夏世有哲王受此丕基王配于京大
哉王之受命而都之也俯協白麟之符仰寤赤烏之禎
承以天命之眷正以寶龜之靈越豐水之東而宅是
鎬京實以繼十六王而始居開八百年之太平考其
地勢為古雍州為今京兆函嶠二華之踞其左襲斜

隴坻之界其右終南太乙之表其前洪河涇渭之帶
其後天邑亢爽惟神皋之所託上腴廣衍乃奧區之
所受於是辨方位建國鄙經歷九軌城隅九雉左祖
右社面朝後市翼翼巍巍四方所視若其五十封族
八百分邦壯我屏翰守我井疆維城磐石根深本強
使天下輪運而輻輳宜其縣世陔於久長想夫蹠蹠
之僚駕趨遙羽肅肅之后駿奔踵武執珪執纁貢球
貢紵九夷之表八蠻之主賈贄聯絡膜拜偃僂楷夫

來於肅慎葵獸獻於西旅紛重舌而九譯僉來王
而順序於時開明堂臨辟雍旒冕密勿衣冠會同
盛禮興樂於論鼓鐘庭實千品旨酒萬鍾舞掉八
佾歌洋九功漏澤霈甘雨仁聲逐祥風此鎬京之盛
際而非曩日岐豐之可以比隆矣迨夫成王五遷卜
惟洛食土中是據土圭攸測風雨交會貢賦均適協
周召之經營朝萬方之玉帛遷殷頑兮是處務密邇
乎王室何艷鄙之復還固未忘于故邑慨歷世之十

二念萬物之失生觀魚藻之興刺將不樂乎鑄京日
嬖色以自縱乃遂焉而逢殃吾已知宗周之不競而
轍一東於王城矣賓之言未已而主人喟然嘆息曰
客誠好古之流歟惜乎信耳而遺目也子能知古昔
之西京而未知今日之北京也皇矣上帝求民之莫
大哉至哉乾坤元德作我父母天開地闢乃眷北顧
此維輿宅蓋自帝堯啓都召公拓迹慕容不能稱此
土完顏不能據茲域惟聖人之應符環衆星而拱極

累列聖之洪基貽萬葉之燕翼若其前滹沱後居庸
雪山峙其西太行屹其東拊上谷為脊脊控中夏為
腹胸曾不恃乎巖險與襟帶未足擬諸其形容蓋其
光宅四表仁深草木厯開八百狹周基之興龍形得
百二悼秦關之失鹿八方士女同后妃節儉之風萬
里衣裳比公子仁厚之族故城郭之大在無外之寰
宇宮室之美在可封之比屋使漢京之賦賦之而未
盡雖周鑄之歌歌之而不足賓幸生乎元世夫何信

耳而遺目賓乃快墨不言慄然下意遠巡避席謝罪而退

大都賦

有序

元
黃文仲

竊惟大元之盛兩漢萬不及也然班固作二都賦天下後世誇耀不朽今宇宙昇平宜播厥頌文仲幸生聖世獲觀大都雖不克效其聳牙之文繁豔之語亦不願聞其奢靡之政浮誇之言謹摭其事撰大都賦上於翰林國史謹以備采擇之萬一其賦曰

有客以風雲為氣江海為量一蹈萬里顧盼伊壯嘗掉
鞅金陵鼓柁錢塘浮汴入洛西遊咸陽臨殘城之餘景
黯煙草其悲涼悲哉敗國之迹何必於此乎彷徨方今
天廓一宇地合八埏皇居帝闕新宅於燕萬方臣妾罔
不後先猶北辰之朝列宿東海之會百川今也不往白
首何年道齊魯以前邁歷趙魏而北轅亦既至止於觀
都內非雷而喧非電而奔懍兮恍兮殆失所存大都主
人目而招之曰子豈出蛙坎而望滄渤脫蟻封而覩瑤

崑者邪何神志不定四顧市人若將襲而問之也客曰
唯唯予行天下多矣獨此大都足不及履城闕之雄風
物之異幸子告我毋以為鄙竊聞燕之為壤古曰幽州
召公拓其規昭王闡其猷慕容據之以爭中夏完顏臨
之以朝諸侯名蹤勝跡萬歲千秋子能舉之否乎主人
撫掌而笑曰固哉客之問也彼小國一君偏方一主朝
盛夕衰何足以語維昔之燕城南廢鄂維今之燕天下
大都宇宙千齡而啓運帝王一出而應符山川改觀民

物易居開天拓地自作制度豈轍人之軌而躡人之跗
我太祖皇帝之龍興也乘乾位王水德耀玄武撫璿極
鐵騎長驅金燼奄熄控扼南邦於焉駐蹕列聖相承有
事疆場顧宮室其未遑日飭厲乎兵革世祖皇帝神聖
武文既傳國以建號復紀元而書春操轡策而馭羣雄
臨水火而救兆民授閭鉞者如靖如勳運廟謨者如張
如陳有角皆崩無擾弗馴雨露所被知其澤風霆所至
知其神是宅是圖以取以守恢皇基於億載隆畿制於

九有因滄海以為池即瓊島而為園近則東有潞河之
饒西有香山之阜南有柳林之區北有居庸之口遠則
易河滹水帶其前龍門孤嶺屏其後混同鴨綠浮其左
五臺常山阻其右所謂子孫萬世帝王之業與海岳相
為長久者也乃樹厥墉乃鳩厥功畫萬址以效地連萬
雉而橫空高謂山兮何平長謂堤兮何崇闕門十一四
達憧憧蓋體之而立象允合乎五六天地之中前則五
門駢啓雙闕對聳靈獸翔題而若飛怒猊負柱而欲動

東華西華翼其傍左掖右掖夾而拱開厚載以北巡迤
邐乎行在之供奉內則宮殿突兀樓閣扶擁如峯之攢
如濤之涌瓦與天一色而瑠璃滑壁與霞爭光而臙脂
重宮宮堯堯縹縹緲緲金楠雕楹華枕彤檠揭崇天之
扁於雲端卓鎮雷之竿於漢表奮角張牙衡脊鼓翼浮
動於蒼松翠檜之杪後則竒峰怪石巒巒岈岈異葩珍
藹檀檀藥藥紅者珊瑚青者琅玕亦肪其白亦錦其斑
中有虎豹犀象熊豕鹿獐鷹鷂鷓鴣猛足健翰莫不承

恩被澤飛走乎其間又有西天比丘傳戒伏魔手繡金字頭茸緒毛輦內舁酒鳴鼓吹螺居之圓殿為國護持出入清禁莫之誰何上有廣寒莫於嵯峨聽政之暇憂民之勞御步輦以臨幸垂天目於秋毫下引西山之淪漪蟠御溝而溶滃經白玉之虹橋出宮牆而南逝以佃以漁以舟以楫普為萬民之利聖人之心可謂至矣且以一統之大四海之富非不能窮美而極麗固將昭恭儉之先謀垂法則於後世也於是東立太廟昭孝敬焉

西建儲官衍鴻慶焉中書帝前六官稟焉樞府帝傍六
師聽焉百僚分職一臺正焉國學崇化四方景焉王邸
侯第藩以屏焉神州赤縣首承令焉彬彬乎簪笏之林
古無此盛矣迺闢東渠登我漕運鑿潞河之垠塲注天
海之清潤延六十里瀦以九堰自汴以北者輓河而輸
自淮以南者帆海而進國不知匱民不知困遂使天下
之旅重可輕而遠可近揚波之櫓多於東溟之魚馳風
之檣繁於南山之筍一水既道萬貨如糞是惟聖澤之

一端已涵泳而無盡論其市廛則通衢交錯列巷紛紜
大可以並百蹄小可以方八輪街東之望街西髣而見
髣而聞城南之走城北出而晨歸而昏華區錦市聚四
海之珍異歌榭舞榭選九州之穠芬招提擬乎宸居塵
肆至於宮門酤戶何熒熒哉扁斗大之金字富民何振
振哉服龍蟠之繡文奴隸雜處而無辨王侯並驅而不
分屠千首以終朝釀萬石而一旬復有降蛇搏虎之技
援禽藏焉之戲驅鬼役神之術談天論地之藝皆能以

蓋人之心而蕩人之魂是故猛火烈山風之轟也怒風
薄雲市之聲也長雲偃道馬之塵也殷雷動地鼓之鳴
也雲庶之極莫得而名也若乃城闔之外則文明為舳
艦之津麗正為衣冠之海順城為南商之藪平則為西
粵之派天生地產鬼寶神愛人造物化山竒海怪不求
而富主不集而自萃是以吾都之人室無白丁菴無浪
蕩贏於毫毛運意於徒倍一日之間一闕之內重穀
聚百交湊闐闐初不計乎人之肩與驢之背雖川流雲

合無鞅而來而隨消隨散杳不知其在至其貨殖之家如王如孔張筵列宴招親會朋誇耀都人而幾千萬貫者其視鐘鼎豈不若土芥也哉若夫歌館吹臺侯園相苑長袖輕裾危絃急管結春柳以牽愁佇秋月而流盼臨翠池而暑消褰繡幌而雲暖一笑金千一食錢萬此則他方巨賈遠土謁宦樂以消憂流而忘返吾都人往往面諛而背訕之也言其郊原則春晚冰融雨霽土沃平平縣縣天接四目萬犁散漫兮鴉點點千村錯落

兮蜂簇簇龍見而凍根載茁火出而早楚漸熟柳暗而
始時瓜棗花而猶播穀栽草數畝可易一夫之粟治蔬
千畦可當萬戶之祿寒露既零雄風亦多率婦子以刈
鉅憂氣候之蹉跎來軫去穀如亂蟻之潰殘垓千困萬
庾若急雨之漚長河爰滌我場其樂孔多有門外之黃
雞玄隼與沙際之綠鳧白鶩收霜菜以為道釀雪米以
為醴社長不見呼縣官不見科喜豐年之無價感聖化
而謳歌嗟夫飢者帝食之寒者帝衣之居者帝安之亂

者帝治之中統之深恩至元之厚惠民之思之庸有既
乎矧我皇上纘二世之鴻烈紹六世之宏基明侔乎兩
曜令信乎四時惠顧下土載謀載惟謂一農不遂其耕
則四民或受其飢傷我畜者虎狼害我苗者鹿麋每歲
孟春親御六飛南臨漫行大獵乎鄴水之湄萬騎分馳
霆奮颯發弦鳴禽落網動獸蹶百鷲舉層雲裂羣獫奔
歲草絕飛者委毛走者僵血虞衡奏功天子乃悅匪耽
意於遊畋將講武以蒐閱畢獻禽而行賞迴翠華而北

轍遂幸上都避暑於朔慮牧畜之妨農逐水草於廣莫
雲媯以南既芟既穫徐擁輿衛毋俾民虐千官領至羣
樂大作天子之心為民而樂彌畿甸之千里悉扈駕之
部落維牛維羊維馬維駱貧民以百計富者以千約民
之五雞二豕何遼邈哉由是慶區宇之昇平彰穹昊之
明貺嚴聖心之翼翼爰潔備乎祀饗道流間南北之音
釋子雜蕃漢之狀步虛而款鸞鶴演樂而供獅象穆穆
在前赫赫在上非沉非甲而在乎明德之馨香於戲列

祖造之聖主保之賢臣佐之兆民好之上帝無私善必
報之故詩以太平為萬年書以皇極為五福天人相與
之際殊無竒術異道也猗歟盛哉大都之事何可勝紀
吾網提而領挈之使爾啓聾而聽刮盲而視嘗鄙夫二
都之賦蟲魚草木何太瑣細吾若效之將與子談三月
而不止客曰然醯人誇釀酒人誇釀母怪乎當時之士
好鼓舌而搖脣古我帝王自冀至洛惟以都名漢唐東
西因以方名吳蜀魏汴咸以地名今名以大誇孰甚焉

主人變乎色曰爾言過矣豈謂鴻之翮而猶鷁之翮蜥
之鱗亦猶龍之鱗邪大之為義無匹無倫非我皇上之
德疇克當之汝復坐而聽我所云帝不爭土王始制地
始焉萬國終焉七氏畿封之內會盟戰誓自君自長何
有於天子厥後能統一者秦漢晉隋唐而已西至乎玉
關東至於遼水北至於幽陵南至於交趾得縱者失橫
有此者無彼大哉天朝萬古一時淶江成血唐不能師
今我吏之遼陽高麗銀城如鐵宋不能窺今我臣之回

鶻河西漢立銅柱馬無南蹄今我置府交占雲黎秦築
長城土止北陞今我故境陰山仇池駛舌螺髮髻面雕
題獻葵效馬貢象進犀絡繹乎國門之道不出戶而八
蠻九夷謂之大都不亦宜乎客曰博哉子之所言上周
乎乾下括乎坤故能獨高萬古而號曰大元於是主人
曰未也爾知其大未知其所以大是猶遠望巨峰而不
見其址近覩長江而不見其源吳起不以西河為美而
德其美婁敬不以洛陽為安而德是安况巍巍蕩蕩之

境必有強其本而壯其根者也且夫陳主歸隋周王入秦山陽祖送萬古悲辛惟我國家待降以賓藐江南之趙孤能納土而稱臣既寵之以封爵復全之以終身彼南巢之放猶有慙於古人孰大乎吾天子之仁元封殫力西南之墟貞觀暴骨東南之土一人逞欲萬姓何苦惟我國家止戈為武謂荒裔之民得之不利於用謂贅疣之地取之不益於富罷橫海之戈船但遣使而存撫彼有苗之誓猶且蹂於師旅孰大乎吾天子之怒羽林

象天之儀衛梨園傳月之音樂帝皆是却不警不蹕從
百僚之控鶴何其然也舜德之大臨下簡也江都錦繡
亦可赧也織坊爛霞之金繡局委雲之茸帝不是用以
彰美吾聖躬何其然也周德之大在位儉也商臺玉衣
亦可念也惟我聖皇五輅不乘八鸞不駕雨則獨乘象
輿霽則祇御龍馬何其然也念我烈祖鐵衣雨汗弗敢
安也神禹之大胼胝四載思艱難也惟我聖皇奉坤母
建隆福正事御構五華宮不為廣殿不為奢何其然也

念我先皇居數十年弗敢改也唐堯之大土階三尺防
驕泰也若乃國之大寶惟忠惟亮聖皇思之是宗是尚
可官也不以勲門不以世賞可擢也或賈或術或伶或
匠開東閣者載搜載訪寧不起膠鬲於魚鹽拔百里於
廝養國之大鑑惟夫惟祖聖皇奉之是惕是懼瞻彗象
則宥刑聞水旱則蠲賦百官貢香如帝親舉祇見宗廟
俎豆鐘鼓彌天浮屠浩不可數普閱法藏幣帛金楮變
陰陽者載佐載助寧不覩景星而瞻慶雲酌醴泉而飲

甘露國之大柄惟賞惟刑聖皇操之是重是輕或錫之
黃白予之土田而賜之服乘非必大功也以一技一善
亦人之所能或釋之桎梏免之斧鑕而周之金繒非必
大惡也以一形一氣亦人之所生掌邦典者持權而視
衡寧不陋敝袴之韓侯隘不赦之孔明國之大本惟民
惟社聖皇憂之靡夙靡夜勞矣哉遣問疾苦困矣哉詔
卹矜寡庶獄繁哉宥之以洗寃貪夫毒哉戮之以懲下
居郡國者承流而宣化寧不歌康衢之謠播行葦之雅

至若親親也則諸王鞏磐石之宗分邊戍總兵戎老
也則大臣忘祖帳之送奉朝請食鼎鐘柔遠也至簡至
易亶明亶聰大綱既舉大化亦洪將胥慕於稷契孰肯
附於鯀共丕顯哉聖皇之德日盛日隆前乎百世不得
軋其步後乎百世不得踵其蹤惟其有大德之大故能
成大元之功惟其有大元之大故能成大都之雄客曰
問一得三云胡不喜惟茲三代孰得而比主人曰詩不
云乎維其有之是以似之夫元者天地之苞也德者天

地之美也都者天地之會也微天地之大孰能與於此
哉客起而歌曰天其玄兮地其黃兮維此大都統萬方
兮天其生兮地其遂兮維此大德囿萬類兮天其高兮
地其厚兮維此大元齊萬壽兮恭望闕廷頓拜舞蹈而
退

皇都大一統賦

有序

明 金幼孜

洪惟天朝太祖高皇帝誕膺景命龍飛淮甸既渡大江
遂都金陵撫有區夏肇造洪基以開萬世太平之業逮

我皇上繼承大統克紹丕圖仁恩誕敷聲教洋溢雨暘
應期民物阜蕃薄海內外罔不率從而自蒞祚以來宵
旰拳拳惟思所以繼志述事以承太祖高皇帝之意於
是倣古制肇建兩京以為北京實當天下之中陰陽所
和寒暑弗爽四方貢賦道里適均且沃壤千里水有九
河滄溟之雄山有太行居庸之固玉泉之流經緯乎禁
籞之中碣石之壯盤踞乎畿甸之內故其山川之壯觀
風氣之清淑真有以卓冠四方為萬國之都會誠帝皇

子孫萬萬世太平悠久之基由是敕冬官洎内外文武百執事經營於茲而凡民庶士卒工匠之流莫不駿奔子來趨事赴工罔敢或後遂至天意人心感孚和同靈應疊臻嘉祥屢薦不數年間厥功告成而宮闕府庫之宏壯郊廟社稷之嚴肅朝市民物之鉅麗秩乎其有序井乎其具列盖自古先帝王都邑之盛未有逾於此者乃永樂辛丑春正月朔旦皇上御奉天殿大朝海内文武羣臣四方蠻夷酋長率皆在庭踴躍鼓舞以為皇都

之奇麗若此誠曠古所未見而未有者而所以為皇上
萬壽之徵宗社磐石之固聖子神孫寶祚綿延之慶皆
兆於此矣何其盛哉臣幼居禁苑職業文詞幸際昌期
躬覩盛美謹鋪張為賦以彰太平之偉烈且以昭示於
無窮其辭曰

維太祖之受命膺上天之禎符奮布衣於淮右提一劍
而長驅乃翦夷於羣醜悉蕩滌於寰區既渡大江金陵
是都虎踞龍蟠興王之居爰啓鴻業肇開皇圖振光華

於曠古恢萬世於弘模繫我聖皇祇膺寶歷奉天勤民
太祖是式恩覃九圍仁周八極雨暘應期民物豐植觀
四方之清寧乃有念於京邑維此北京太祖所屬天造
地設靈鍾秀毓總會於陰陽盡灌輸於海陸南臨鉅
野東瞰滄溟西有太行之巖嶺北有居庸之崢嶸瀉玉
泉之逶迤貫金河而迴縈瓊島上聳以盤礴太液下澈
而泓澄將繼志而述事必於此而經營乃敕羣工乃命
百職萬方子來效勤殫力萃四海之良材伐南山之鉅

石感恩意之昭乎戒經營而弗亟於是天心協順靈應
彌彰布輪囷之卿雲發璀璨之祥光醴泉湧其浩浩甘
露下其瀼瀼赫萬靈之呵護藹瑞氣於穹蒼乃卜良辰
乃蠲吉日以相以度以構宮室棟宇崇崇簷楹秩秩以
蓋以覆陶冶埏埴以繪以圖黝堊丹漆煥五采之輝煌
作九重之嚴密天地洞開馳道相連金鋪絢日玉柱凌
煙星羅碁列壁燦珠聯虹飛霞擁龍翔鳳騫超凌氛埃
壯觀宇宙規模恢廓次第畢就奉天屹乎其前謹身儼

乎其後惟華蓋之在中竦摩空之偉構文華翼其在左
武英峙其在右乾清並耀於坤寧大善齋輝於仁壽豁
千門之雲矗敞萬戶之輻輳至若丹闕巍巍飛觀凌空
觚稜上聳閣道遥通左祖右社蔚乎穹窿有壇有墻有
寢有宮亦有天地以嚴其崇復有石渠天祿以蓄圖書
玲瓏綺錢照耀文疏懸牙籤之萬軸列緗帙之紛如宛
奎壁之宵映燦藜燈之夜噓瀛洲文學之士閭苑列仙
之儒備顧問於朝夕咸欽仰於聖謨又若大庖光祿列

乎西東珍羞駢羅玉食惟豐禁城之下金水溶溶畫棟
凌雲繡柱含空璇題耀日綵橋駕虹雕甍隱映寶殿玲
瓏太孫所居諸王之宮金枝玉葉照耀層空育德講學
宴適遊從若夫御苑逶迤上林深窈有山有泉為臺為
沼巖谷谿研雲霞縈繞走有奇獸飛有靈鳥樂寬閒以
棲息恣回翔以馴擾復有天閑十二駿骨軒昂渥洼神
龍之種大宛名駒之良並權奇而雄傑或磊落而騰驤
又若廩庾輪囷惟萬惟億豐歲所儲累世之積玉粒金

稔露積充溢國用所資人足家給復有武庫巍峩戈矛
森列旗幟搖雲鎧甲耀雪凜凜白旄差差黃鉞四征不
庭以彰九伐奮軍聲之揚揚振皇威之赫赫又若內帑
充物寶藏紆餘竒珍異產海匯河輸夜光之璧明月之
珠琉璃翡翠瑪瑙珊瑚車渠琥珀火齊璫璣錦繡迺遷
羅綺芬敷又若百司庶府有綱有目文武頡頏為國鈞
軸太學郡庠之並建琳宮梵宇之森矗列九衢之坦坦
引六街而相續閭閻櫛比闐闐雲簇鱗鱗其瓦盪盪其

屋馬馳聯轡車行擊鼓紛紜並驅雜遝相逐富商巨賈
道路相屬有貨填委丘積山蓄又若歌樓舞榭豔態穠
妝羅袖迴雪清聲繞梁管絃嘔啞狎坐傳觴娛青陽之
麗景駐白日之飛光雖小大之不遺仰制度之畢備斯
皆聖智之籌謀實出宸衷之經緯儼氣象之一新壯規
模於萬世屹鴻基之豐隆偉山河之巨麗貽子孫以嘉
猷紹先皇之初志邁豐鎬之舊規軼漢唐之遺制於是
厥功告成慶叶天人乃歲辛丑維孟之春王正之月朔

旦良辰聖皇臨幸大朝羣臣内外文武濟濟彬彬戎狄
蠻貊工商士民稽首嵩呼抃舞歡欣筐篚具列方物畢
陳以饗以醑洽此皇仁大一統而無外謁至和於八垠
臣忝詞垣叨職文字懷眷寵之彌深愧涓埃之無補際
千載之良逢幸微生之快覩傳盛事於將來奚往牒之
足數祝萬壽於萬年播皇猷於千古

皇都大一統賦

明

楊榮

維皇明之有天下也於赫太祖受命而興龍飛淮甸風

雲依乘恢拓四方弗遑經營既渡江左乃都金陵金陵
之都王氣所鍾石城虎踞之險鍾山龍盟之雄偉長江
之天塹勢百折而流東炯後湖之環繞湛寶鏡之涵空
狀江南之佳麗匯萬國之朝宗此其大略也迨於聖皇
嗣大一統剛健日新聰明天縱囿四海以為家登羣賢
而致用思繼志之所先惟都邑之為重於是天意鑒觀
人心和同神靈效順龜筮協從既應天以順時爰辨方
而正位視往聖而獨超繼高皇之先志乃相乃度載經

載營眷茲北京山川炳靈其為形勢也西接太行東臨
碣石鉅野亘其南居庸控其北勢拔地以崢嶸氣摩空
而崩方復有玉泉漫流宛若垂虹金河澄波雪練涵空
膏渟黛蓄浩渺冲融包絡經緯混混無窮貫天河而為
一與瀛海其相通爾其派連析津源分潞水既環抱以
縈迴亦瀟茫而清泚來職貢於四方通檣帆於萬里至
若王畿之內輦轂之間沃野彌望原陸寬閒煙火相接
雞犬相聞宵無警柝外戶不闔以牧則蕃以種則穫以

佃以漁以耕以鑿隨其所營皆得其樂而其為都也四方道里之適均萬國朝覲之所同梯航玉帛為都邑之會陰陽風雨當天地之中爰敕臣庶爰伐材木南浮湖湘西入巴蜀斧披虹霓聲撼山谷徂徠之儲新甫之蓄榘枌杞梓杉檜楠梢橫青天根連地軸鉅細畢輸長短悉錄駕雲車之百輛振龍驤之萬斛紛紜輻輳彌布川陸厥材之良不一而足若乃美石比玉從古所稱瑩者如圭潔者如瓊溫者若璐潤者若瑛以磨以礪乃堅

乃貞鏗林振壑馳颯驚霆千夫所攻萬里啓行山靈助
其光華坤后發其精英豈砒砒之敢混實寶玉之爭呈
若夫坎離播功坤艮合德出於陶冶成於埏埴飛紫燄
於半空結祥煙於八極或規以圓或矩以方燦琉璃之
一色耀文采於中央或肖形於獸吻或擬質於鴛鴦於
是良時載啓吉旦既卜臣庶駿奔滂若雲龜源源其來
登登其築百堵皆興萬夫相厲行若魚貫立若鱗蹙奔
斤揮霍尺度攢簇由是責育效力公輸獻竒曰爰曰斯

伯與暨垂攄厥巧思運厥神機各效其能以見於為顧
小善之並錄矧妙伎之或遺羣材礮磊以山積鉅棟騰
躍而翬飛爾乃九門洞開三殿攸建觚稜雲聳丹漆霞
絢輦路逶迤閣道迴轉華盖屹立乎中央奉天端拱乎
南面其北則有坤寧之域乾清之宮璇題耀日寶柱凌
空金鋪璀璨綺疏玲瓏珠玉炫爛錦繡丰茸歲蕤起鳳
天矯盤龍千門瑞靄萬戶春融其南則有午門端門左
掖右掖丹闕峙而上聳黃道正而下直豁大明之高張

屹正陽之拱揖繚周廬之穹崇蔽重慶之護翼其左則
有宗廟之祀以奉祖考仰在天之神靈隆萬古之尊號
謹歲時之烝嘗薦純誠於蘋藻其右則有社稷之靈以
崇祀享汎壇壝之肅清通神祇於肸蠁爰春祈而秋報
用昭荅於靈眈若夫乾清之前門列先後日精月華之
對峙景運隆宗之並構謹身翼乎其前仁壽屹乎其右
又有奉先之祠大善之殿文樓武樓之特聳左順右順
之並建若乃震位毓德文華穹窿亦有武英實為齋宮

有天財寶藏以貯珍貨有大烹光祿以典飧饗寶善在
左以翼翼思善居右而崇崇若夫欽安之後珠官貝闕
藻繡交耀雕櫳翦竄六宮備陳七所在列親蠶有館繅
絲有室二南詠歌播於篇什輔德相承風化洋溢皇城
之外殿宇魁渠有翼有嚴太孫之居金水之濱瑤階玉
除梁棟巍巍上凌太虛為諸王宮翊衛皇圖星羅綦布
以臨九衢至若文淵之閣祕書之府纂述乎今儲蓄乎
古汗牛充棟莫知其數牙籤迤邐緗帙旁午燦奎壁之

上連赫虹霓之夜吐若夫飛閣峩峩實為承天繡楹霧
簇畫拱星聯踞石視之盤礴聳華表之歸然至若南郊
之設特超古制園丘方澤不岐以二合祀於中父母天
地壇分內外二十有四羣祀有典百神有位惟我太祖
實配上帝乃歲孟春三陽之始吉日斯蠲祀事有備薦
以粢盛泛以醴齊豆籩秩秩庭燎晰晰鼓鐘戒嚴饗與
至止儼對越以升中祝蕃禧之攸萃至若山川有壇先
農有祀馬祖旗壽各以時祭寅畏恪恭罔有弗至若夫

稽古建官為民之牧內外相承各率其屬至若黃門給
事青瑣仙班典內庭之封駁近咫尺之天顏復有文翰
之林詞藝之苑處嚴密之清禁列英華之妙選優游玉
堂之署出入金鑿之殿擅瀛洲之美譽承黼宸之清問
至若鳳池之職尚寶之司掌絲綸於紫誥典符璽於彤
闈有宗人以統天潢之派有銀臺以通喉舌之機若乃
六卿分職位躋台鼎贊廟堂之謀謨總藩方之政令至
若憲臺之任風紀是司誠耳目之所寄實法度之攸施

若夫都府有五軍政是宣奮馳貅之將士耀霜雪之戈
鉞保圖輿於安堵掃絕漠之烽煙至若都邑有庠辟雍
有學育才於茲以儲以擢若夫容臺典祀士師明刑錦
衣總夫儀衛巡警係於五城鴻臚謹朝謁之禮太僕司
監牧之名京畿布列於州郡田野參錯於屯營至若奉
神有祠報功有廟梵宇琳宮光輝朗耀倉廩之積如坻
如京露積紅粟陳陳相因鎧甲晶熒士卒精銳靡強弗
摧靡堅弗碎驂騶騏驥腰褭驕驕宛冀之駿渥洼之良

充乎內殿磊落騰驤又有福山後峙秀出雲煙實為主
星聖壽萬年層嶂疊擁奇峰相連鼓鐘有樓其高接天
勢若貫珠萬里繇延若乃朝市既成井邑斯列閭閻輻
輳闐闐有截豁九達之通衢羅萬室之如櫛富商巨賈
肩摩袂接北通朔漠南極閩越西跨流沙東涉溟渤來
百貨之縱橫雜輪蹄之填咽珠璣爛其輝燿羅綺燦其
騰沓至若青樓並峙綺榭相連妖姬窈窕豔女嬋娟穠
妝競倚粉黛爭妍引歌喉之宛轉迴舞袖之踟躕極酣

嬉於暇日窮勝賞於芳年至若太液之池萬歲之山澄
波激澗層岫巒岼開闔蔽虧紫帶迴環竦飛樓於曖曖
敞貝闕於巖端門臨碧蘚之磴橋架玉虹之灣晴光出
乎軒檻飛翠灑乎闌干瞻廣寒之月殿撫桂樹之團團
爾其瑤草龍蔥琪樹羃歷長松之盤古柏之直修篁烟
挺老檜雲積瑰偉之姿竒異之植翁然其陰媿然其色
宛蓬瀛之在茲恍塵凡之遂隔至若上林衍沃靈囿逶
迤瀦以碧海湛以深池百草綠縟羣卉芳菲寬閒薄乎

禁籞平廣屬乎坤維樂鱗介之游泳縱毛羽之襍褫乃
有騶虞效祥麒麟表瑞白質黑章麇身牛尾神鹿貢於
遐方白象出於南裔倏玄兔之繼呈忽天馬之沓至復
有馬哈福祿厥獸殊形駝雞之異白鳥之禎竒姿詭態
率舞縱橫隸首莫紀伯益難名至若地祇協順天心昭
格嘉祥疊臻靈貺蕃錫神木不運而自行祥氛煥發於
巨石忽靈蛇之前導現大青於沙磧瑞光煜乎半空卿
雲縵兮五色醴泉湧兮瓊漿甘露滑兮玉液靈芝產於

碧山景星見於南極禿千兔以難窮殫百喙而莫悉然
而歷觀前代迄於往古帝王所都難可畢舉豐鎬之美
崤函之固宛洛之奇汾晉之富雖或雄據於一時控馭
於中土而於今茲帝都之壯麗又豈可以同年而語哉
迺歲庚子告成厥功辛丑正旦方春和融聖皇御寓萬
方會同百辟卿士肅肅雍雍蠻夷戎狄罔不率從戴白
之叟垂髫之童且欣且忭拜舞呼嵩仰祝聖壽萬福來
崇慶此皇都佳氣鬱蔥擴基圖於萬世偉壯觀於九重

真帝王悠久之業據山河表裏之雄然而聖天子以六合為家以四溟為池以仁義為干櫓以禮樂為藩維不恃險以為固惟在德之所施至和塞乎穹壤恩澤洽乎華夷致九有以寧謐躋萬國於雍熙此其所以德侔乎堯舜道合乎軒羲窮天地亘古今而莫能與齊也臣職禁垣叨蒙眷顧謗陋是慙涓埃莫補覩皇都之巨麗壯宏規於往古潔泓穎於長辰陳盛事以為賦又從而為之歌曰翼翼皇都萬方之會兮聖德之宏實同覆載兮

聲教所暨一統無外兮又歌曰皇都翼翼民之所止兮
惟皇萬壽福祿無已兮聖子神孫寶祚萬世兮

皇都大一統賦

明 胡啓先

若有儒生小臣好古耽文遠稽虞夏商周之載籍近閱
秦漢唐宋之遺言於是歷冀亳而覽豐鎬睇咸陽而望
長安仰東西兩京之制於往昔觀南北二京之壯於今
日載閱淮濟載涉河易爰盼太行爰俯碣石顧并管以
徬徨履滄薊而跋躅觀於都城則氣象弘廣即夫山川

則形勢雄壯其物產之利素豐饒其人民之俗尚義讓
乃上天之眷命而聖人之化成實在於斯故我朝肇建
皇都而天下一統宜在於茲邪方歎慕而未已若愴怛
而何之迺有先生長者雍容怡愉邀坐而問曰吾聞登
山者必即其崇岡涉海者必測其汪洋今子遊觀於皇
都能舉其大綱乎願聞其說生曰唯唯生雖不敏請陳
其槩夫四通是交八達所會水走舳艫陸奔輻載星拱
萬國囊括四海其宮闕則奉天華蓋謹身三殿以正位

乎外乾清坤寧兩宮以正位乎內位夫西則武英為宴
居之密位夫東則文華為繼體之大其尊卑以天地為
法象其交構與陰陽相合配駢集夫杞梓之材文彩夫
玄黃之績既觀天而穹窿極盤地而磊塊民庶咸子來
工師呈巧最實所謂華美而不奢泰者也其都城方廣
萬雉弘闢九門建樓設閣通道達闕晨鐘暮鼓更別漏
分士夫林立而商賈雲屯者也先生曰此特宮闕城郭
之美而已願更其辭於是生復請曰今之皇都古為冀

州伊洛距其前恒嶽倚其陬環西山而作城界東海以
為溝羈梁雍而絡青兗控戎豸而御吳甌導江淮以共
注引河濟而北流即金臺瓊島之可登望撫太液盧溝
之可泳游阻居庸古北以為闕則遠人震懾闕趙魏齊
魯而成衢則侯甸來朝故宜帝皇之都而為萬世之良
謀此太祖之所以創業而皇上之所以闡皇猷也先生
曰此亦山川形勝之槩而已願悉其大於是生復請曰
地土肥腴千里夷壤良木冬榮嘉禾夏長松柏檜樟梨

栗棗橡成林叢生干霄直上黍稷稻粱桑麻菽粟豐年
蔽野暢茂接屋一夫所耕十夫是足一歲所獲三歲之
蓄於馬充棟而資廟廊供棗盛而具廩祿也又有珍禽
異獸則若鷹鷄鴻鵠熊猿雉兔虎豹麋鹿翺翔郊數馳
驅林谷隨取而獲應捕成觸於以備畋獵而具蒐狩供
宴饗而資庖肉也先生曰地利之美可以養人而非所
以成化者也於是生復請曰方今四海一家萬夫同志
典文治者咸臯夔稷契之徒任軍旅者悉呂召孫吳之

類故六卿協衷而五軍整勵加之居藩鎮者各恭厥職
處守令者咸敬乃事是以郡禮樂而邑詩書家和睦而
人孝弟農樂耕稼士懷忠義商通貨財工精技藝梯航
而來襁褓而至也先生曰子知所以化及於人者然猶
未推夫所以受命於天者也於是生復請曰陰陽調和
四序順理雨暘以時寒暑應氣慶雲見乎天醴泉出乎
地麒麟貢而鳳凰來龍馬獻而獅子至以及景星甘露
之祥芝草嘉禾之瑞白象玄兔之奇素烏鸚鵡之異自

皇上纘大統基皇圖以來莫不駢臻而畢萃於以見上天眷命之隆而帝皇萬世之兆基於是也先生曰子知天命之所在然猶未究夫感化天人之大本也於是生乃再拜而復請曰維我皇上聖神文武德合天地道貫今古其繼天立極與伏羲軒轅同制度也其化成天下與唐虞堯舜合規矩也其順天應人與商湯周武協呂律也故宜建宮城以為居保山川而自固因地利之豐盛獲天人之順助為天地之君師作萬世之父母尊居

天位安享國土言未既先生大笑而語曰斯言盡之可
書以為皇都大一統賦

皇都賦

有序

明董應舉

昔宋人有作汴京清明圖者寓思頌遠穆乎有豐豫之
警國家定鼎金陵成祖改卜取象北極蓋示星拱之義
兼以迫壓異類顯揚威靈有警則烽火易傳地近則號
雷易震赫哉聖謨莫於世世矣侍御某公深得此意繪
之縹素名曰積勝予反覆流覽仰聖神之無競見皇圖

之有奕撫卷吮毫不覺媿媿夫豐水貽謀商邑建福商
周諸君子之所侈揚也上林三都亦極才人之致予雖
才謝昔人而意各有為豈曰侈目飾觀曼靡蕩志云爾
其辭曰

伊昔建邦實重上游扼險百二環顧中州漢鼎西奠宋
襲東周強弱斯判圖大其謀惟我國家開天闢地始基
於南亶其北旆天啓北土乃殖乃昌收虞都之疆跡應
箕尾之靈先天則有樞皇則有宅汎六百年之氛翳奠

億萬載之丕則控沙漠之絕域憑滹河之橫駛枕居庸
標碣石左環滄海右擁太行鷲峙鳳翥翼其有京前則
涿鹿蜿蜒黃帝之所戰蚩尤也後則追朔倚薄名公之
所奄北國也蝕於元遼集於天邑纏日月之綺纒岼宇
宙之軒廓臨制八方揮慶六幕於是定鼎凝命正離燕
翼卜郊立社經野建極闢四墉開萬雉黃道周亘紫垣
閔恤鑽玉柱以擎天截金題之炫日欽岑迢遞截集監
壘竒端門之太極耦乾坤之清寧文華武英論道承明

亦有離宮別寢間館崇臺環列星布棊置叢排顯靈祈
祥奉先思孝皇極柔躬東宮啓後長樂鐘聲昭陽樹色
椒房掖庭璇廬祕室亦有芳林茂苑少海蓬萊移天河
於太液儼星渚之滌泗隱栖龍之綽約矯射鴻之雀鬼
流覽目窮圖畫心類外則百司庶府萬井千廛朱甍夾
道甲第雲聯列肆霧幟蹂轂摩肩沓沓璘璘橫貫層駟
則有游士飄纓任俠說劍擊筑快心市駿流羨月滿青
樓仙游竒甸角刺僧廬浮屠隱見五方輳集萬貨波薦

炫目薰心貞夫志變亦有殊方重譯通道造庭東則朝
鮮句麗南則牂柯夜郎西則無戈月氏北則寧鞮烏桓
各以方物來享來王則有歲星之獸疏勒之獅駟虞繡
虎玄豹號犀觸邪獬廌緜駘駘翠鸞孔雀丹鳥奇毛
又有霍山之玉大宛之珠魚腹之璜驪頷之寶鼈文珊
瑚木難火齊寶布象簞錯落照耀斯慎德之所招寶綬
柔之明效也若乃重關屹嶰川原衍盈亭館相屬牙蘄
相乘則有候門尹子抱關侯嬴授管秉籥望氣占星奉

使出狩之軒分符弭節之車鳧羽飾翠雲霓結旂曳隼
星於落日綴明月於圓規走盧溝之危梁馳綠楊之疏
璃斥如電激疾若飆分應接不暇往來繽紛或解韉而
偃息或望塵而載奔或風塵而襲或道汲而泉或負餽
而牧或饁餉而田或倚樹而嘯或荷鍤而眠見稼穡之
艱難知民食之所天至若輦金輦壁鼎肩振颺黃封百
道騰鑄千箱蹶馬仆車咽路轟岡椎膏吸髓塵蹟上方
或鑿山而批禍或航海而遺殃豈共球之所入盡貂璫

之擔懷夫世無勤而不治欲無極而不荒地無大而
紀心無小而不昌雖累洽於列聖亦虞損於復隍嘗試
登高山望紫塞按圖記列職方居庸紫荊山海遼陽去
京師其幾許時業定於疆場蓋有永樂三犁宣德喜峰
銘功瀚海天壤無窮其北狩而來復肅城守而張皇貢
市成而甲鈍犬羊飽而敵強吾安知夫戎馬之不郊櫓
檐之不芒甘泉燧而警漢渭橋薄而迫唐於是皇帝惕
然思蹶然作奮然坐廟堂朝方岳闢四門進鞞鐸祠郊

廟御講幄警桑杜勤錢鎔飭邊防強戎索發內帑以犒
士拔英雄而圖略收出虎於檻阱還埽除於閨閣實閭
閻惠中國歌舜絃之薰風舞堯階之千籥保金甌於無
虞紹祖烈宗功於爍灼將駕三五軼百王垂萬世等乾
坤豈漢鼎唐基所可尺量而尋度也亂曰天地昏蒙日
月揭兮太行剡剡天造設兮襟海帶河背則碣兮四百
重歸胡運竭兮建以為都皇則哲兮衆星所拱九有截
兮萬國共球辰其轍兮定鎮玄冥驅胡孽兮殫威振靈

復芽孽兮犬羊不常誰能絜兮庚戌憑陵城岷隍兮糾
糾干城誰為傑兮守在四夷三五軼兮郊馬不生泉冽
冽兮貔虎百萬狼煙絕兮曰慎德而修備萬世子孫金
甌永無缺兮

大明一統賦

明
莫旦

昔者宋社既屋胡元乃興政乖教弛谷穢風腥延及季
世四方不庭干戈擾攘盜賊縱橫彌勒鼓亂妖言煽驚
或托香軍為號或假前宋為名或稱白蓮或號紅巾楚

有陳而吳有張亮有韓而蜀有珍大豪小猾僭主假君

蛾屯蟻聚鷓鴣張獍鳴是猶衣垢敝而叢虱肉腐敗而多

蠅嗟哉元元困於爭戰威重命輕令嚴膽顫血流漂杵

屍積攢箭鬼神夜哭華宇盡見海溢山崩天鳴地震蓋

九十年矣誠天地古今之大變也於是天生真主奮跡

曰皇兆應瑞雲符乘王氣虎嘯而風龍興而雨將相協

心勇伐新暴立憲欽而右台堯前兵車而後甲士六丁

五帝之呵護九宮八門之威勢復金器良天時地利攻

殺擊刺兮雷轟而電掣坐作進退兮山摧而海沸東征
西怨若大旱之望雲霓尊食壹粟若赤子之恩慈毋故
其起濠穎戰除和拔宋石定京都殪強漢滅偽吳平測
寇降魚鳧取兩廣收八閩江南壤地盡入版圖然後肆
伐中原席捲列郡下魯擊秦攻汴克晉兵震幽燕元軍
北遁僅一戎衣不血寸刃疆域至是而混一天人以之
而協應遂乃勉徇輿情金陵定鼎尊居九重君臨萬姓
大明建號以開天洪武紀元而表正於是討雲南以除

餘孽征蕃部以拓邊境四夷來王萬方平定所以鴻圖
大業傳萬世而無疆聖德神功冠百王而莫並此聖祖
得天下之正所以成一統之盛也猗歟休哉真人曰予
嘗誦九丘考八索訂經史驗圖籍究治亂之源求興廢
之跡惟唐虞兮三代國天下兮千百各子其民兮為君
共宗天王兮述職猶萬水之朝東海衆星之拱北極熙
然太和是謂混一然為跡雖廣而閩粵未通周服雖大
而遠廣未入厥後蒼姬訖錄亂從而出大小相吞強弱

為敵於是析為十二併為六七秦兮無道隋兮滅德兩
晉東西九廟南北三國偏安五代角立其間惟漢嘗一
統而侵於匈奴移於莽賊唐亦一統而離為列鎮改為
周國宋雖一統而銀夏盤踞遼金割裂得縱者失橫有
南者無北所以光霽之時常少而晦暝之時常多混一
之世每踈而分裂之世常密譬如月滿則虧日中則是
是皆本乎天運蓋不由乎人力自古一統其難如此今
先生之一統其信然邪名浮於實邪真人之言未終不

虛生勃然改容曰惡是何言也先輩謂人胸中無幾箇
國子監做不得大儒又謂人不讀書萬卷不行地萬里
看不得杜詩蓋言人必足跡廣而見聞多然後可以言
遠大而超等夷也子不見夫井底之蛙乎兀兀窮年惡
知天地之大又不見燭前之蛾乎營營終夜焉知日月
之明子為此言蓋由學問不得其傳授足跡未嘗出戶
庭無怪乎出言之不謹燭理之未精吾今語子以一統
之所以為大以開子之聾盲真人曰願安承教不虛生

曰茫茫九州焚焚八極上應天文下歷禹跡大梁玄枵
兮冀青星紀鶉尾兮揚州降婁壽星兮徐兗析木姬觜
兮幽并大火實沉兮梁豫鶉首鶉火兮雍營於是四方
之所延袤道里之所紀極霜露之所霑被日月之所出
沒寸天尺地皆入版籍此天下一統之分野也分野既
明疆域乃奠順天應天兩京畿甸鳳陽承天龍飛豹變
餘則蘇松常鎮徽池廬平揚淮和廣滁徐慶寧保和真
順廣永隆名南京以東是為浙江浙分東西嘉湖及杭

金衢嚴處寧紹台溫浙南濱海是為福建福邵興漳汀
泉延建南京西南則江西境昌饒康建撫袁臨信贛吉
九江南安及瑞由江更西湖廣一方則武昌為首漢德
荆襄長黃岳廣辰永衡常承天起聖柳靖鄖陽轉而東
南則為廣東廣州為首潮肇韶雄高雷廉惠瓊居海中
廣之又西桂柳潯寧梧田樂慶恩太鎮明泗利奉向都
龍江陵廣西之西貴州雲南則銅黎思鎮石晉寧安大
雲臨景楚廣潯沅軍民有府數莫可殫貴州西北則四

川地保馬重成順夔及叙此九藩者南方也由南以北
踰淮涉洪則河懷南汝彰衛開封是河南為天地之中
京師東南海岱蒼蒼曰濟曰兗東青登萊則是山東為
鄒魯之邦山東西北大同宣府太原平陽遼汾澤潞是
山西倚於京左京之西南西嶽巍然則西臨漢鳳慶鞏
平延是陝西鄰於四川此四藩者北方也其餘州百縣
千鄉萬里億幅員之廣不可紀極此天下一統之郡縣
也高山廣水后土是載神封作鎮以為限界故麒麟獅

子兮擁鍾山於天中龍虎鳳凰兮拱天壽於雲外祝萬
歲兮太平望諸陵兮朝拜山則天台天日日觀月精玉
筍玉溜金庭金城大邳大別太白太行崑崙匡廬賀蘭
白登麻姑天姥兮虎丘鴈蕩首陽少陽兮內方西傾武
夷蒙羽兮岷嶓王屋八公三竺兮九疑四明予獨尊夫
五嶽五鎮之山兮何高大而神靈饗祀典於無窮兮出
雲雨而化生吾欲效夫尼父之登臨兮小天下於雙睛
水則五湖五溪三泖三湘七澤七渡九河九江伊洛瀍

澗兮涇渭漢沔澗沮汶泗兮沱潛衡漳大野彭澤兮雷
夏荷澤滹沱鴨綠兮巫峽滄浪弱水流沙兮滇池錢塘
黑水混同兮高郵吳淞予獨重夫四海四瀆之水兮何
源遠而流長浮天地而浴日月兮泄尾閭而濫觴吾乘
長風而破巨浪兮蓋有似乎遊聖門而望洋其他疊嶂
層峰千流萬派或崇或卑或小或大國志所書禹貢所
載莫得其詳姑述其槩此天下一統之山河也天潢衍
派玉葉流芳錫圭儋爵建國封王則秦晉周楚齊魯韓

唐遼岷代肅慶谷安湘潭伊瀋郢附以靖江載之祖訓
休矣烈光繇繇奕奕代有哲王惟我興國聖啓龍翔鄭
衛吳越蜀趙荆襄淮邠益德榮吉滕莊徽崇秀許汝壽
岐黃朝輝雍浙衡涇及梁曰裕曰景其來未央王子王
孫兮益蕃益昌郡邑分封兮甲第輝煌彼將軍兮中尉
又遞世兮延長是皆一本百榦萬蕊千枝原衍澤流靈
鍾慶滋彌布九有不數螽斯當與天地相為終始日月
並其光輝此天下一統之藩封也藩封之外遠不可悉

自粵門以南胡門以北東盡東海西踰西域則有天方
日本琉球朝鮮占城真臘亦力于閩渤泥撒馬交趾細
蘭大秦大食西洋西天一弗敵兮勿斯里三佛齊兮蘇
吉丹更有沙華國兮古麻刺弼琶囉兮忽魯謨榜葛刺
兮兀良哈吉慈尼兮默德那木蘭皮兮滿刺伽默加臘
兮茶弼沙瑣里磔里藍無里新羅暹羅弼斯羅蘇祿蘇
門兮哈烈哈密勿拔層拔兮瓜哇阿哇麻逸麻嘉兮打
網打板三苗三嶼兮百燹百花獺鬻獾狃突厥烏桓匈

奴鮮卑契丹先零肅慎火篩回紇吐蕃限以三衛控以
九邊畏威懷德強殞弱降梯航重譯玉帛來王此天下
一統之外夷也國之大事莫先於祀惟祖宗兮在天先
報本之誠意內奉先兮有殿外太廟兮有制盈室崇深
昭穆次叙禘嘗烝萬古不替赫上帝兮皇祇判高厚
兮覆載每歲孟春郊社並舉酌園丘方澤之儀為上棟
下壇之禮父天母地兮同尊祖功宗德兮同配天子穆
穆臣工濟濟薦以玉帛泛以醴齊從祀則日月星辰風

雲雷雨社稷山川嶽鎮瀆海聖帝明王神祇太歲旗纛
先農城隍月將五祀十廟至於川嶽英靈陰陽神鬼藩
國賢王累朝英主道統真儒理學賢士名臣名宦忠臣
孝子循吏高人文士烈女等而上之則自生民以來未
有盛於孔子此天下一統之祀典也萃渙之道既明輔
理之司攸定百司庶府設官分政大小相承體統不紊
故公侯兮爵崇駙伯兮榮並公孤寅亮宗人行慶五府
兵權六部政柄法司慎刑太學儲俊詹事輔儲科道諫

諍太常之祭祀必嚴通政之出納惟允尚寶符臺翰林
史筆光祿宴饗太僕馬政中書筆翰錦衣親軍行人皇
華鴻臚朝聘內監嚴密京兆承宣上林蕃育兵馬巡警
欽天授時太醫調劑進士題黃甲之名賓客匡青宮之
正殿閣閣門清光日近兩京攸同表裏輝映外則藩臬
十三郡縣千百都司運司儒學武學留守襲封陰陽醫
術軍民府分指揮司遞運所分水馬驛至於衛所等局
監苑場司閘壩倉庫關井宮祠王府職制土官羈縻此

天下一統之官制也若夫天語聖言載道論德縹帙牙
籤手騰梓刻緯地經天汗牛盈室乃木天禁地之儲寶
壽邦永命之脈書黜異端用備鑑擇茲不登書恐誤後
學至如資世通訓祖訓條章聖政之紀述大誥之昭揚
文集浩瀚律令精詳日厯纂玉堂之祕寶訓發金匱之
藏禮制頒行於司府集禮詔及於遐邦解論語之蘊奧
正書傳之外訛孝慈錄兮仁至義盡昭鑑錄兮遠慮長
謨思親有詩教民有榜方竹有記白馬有歌雄文大製

誠與典謨相表裏協雅頌之中和此天下一統之詩書也物產既蕃貢賦斯定秋分有糧夏分有稅萬困貯儲千艘轉運採山之利既溥煮海之功尤盛市廛有征壚冶有額閭廢畜牧水陸釣弋機杼所成蠶桑所出庫藏所儲坑塲所入國用所需民生所急此天下一統之貢賦也上行下效謂之風衆心安定謂之俗六經同誦兮六軍同令五教同敷兮五刑同治車同軌而書同文屋同式而衣同製家同塾而黨同庠國同學而術同序文

章同體兮行移同式丁力同役兮土田同稅作息同樂
兮語言同音節令同厯兮日用同器朝覲貢舉兮同期
賞罰封拜兮同制揖讓拜跪兮同儀冠婚喪祭兮同禮
僧道巫祀尼媪兮同禁水火金木土穀兮同利律度量
衡符璽券契兮同於立信金石絲竹匏土革木兮同於
宣滯慶弔餞迎兮同於寓情宴饗餽贈兮同於將意所
以國無異政家不殊風閨無廢職野無惰農比天下一
統之風俗也都邑之宏侈宮禁之森嚴經陰緯陽象地

法天垂萬世之統緒表四海之觀瞻控海連淮江南佳
麗鬱鍾阜兮龍蟠雄石城兮虎踞浩長江兮天塹靄上
林兮春霄是南京為萬方之都會左環滄海右擁太行
南襟河濟北枕居庸瓊島春雲兮薊門煙樹太液晴波
兮玉泉垂虹是京師為萬世之家邦至於阻淮帶江連
河引泗鍾離漢名塗山禹會國家興王實鍾王氣如周
岐豳類漢豐沛是謂中都根本攸繫若夫洞諸門兮禁
城歸萬雉兮神京金門玉陛山河拱抱龍門鳳閣霄漢

光明更有景運隆宗月華日精六宮嚴謹七所紆紫親
蠶有館兮縹絲有室緝熙有殿兮觀心有亭外則百官
庶府綦布而星列千門萬戶霧湧而雲蒸此天下一統
之基業也夫人之見聞有限物理無極故肩背不可以
反顧鬚髮不可以縷析况天下一統其大如此豈常人
所能淺近而窺測哉姑述其萬一而已真人曰然構宮
室者必資公輸之巧定律呂者必賴師曠之聰故舜有
五人而致治武有十亂而成功今天下所以成一統之

盛者雖曰真主挺生歷數在躬然所以左右而輔翼者
必有一代之英雄不虛生曰誠哉是言夫子不見夫天
降時雨山川出雲又不見夫朝陽生矣高岡鳳鳴所以
國家將興賢才彙征理則然也況我聖祖天錫勇智不
階寸土龍飛淮泗英雄萬國不期而會當是時股肱心
膂於其間者豈可以數計哉則有若中山武寧岐陽武
靜關平忠武寧河武順東甌襄武黔寧昭靖堂堂六王
功全德盛餘則胡越盛名吳江智力趙梁氣勇俞駟材

識武襄食都督副之效勞蔡公忠壯東海之戰歿黔國

巢國兩全忠赤郢國靖海並著勲績高陽耿公死節不
屈皆能佐一人以成功配六王而廟食其他攻城掠地
撫順摧強出奇宣力徇義死忠五爵分封廟祀有光澤
流子孫與國同休武功如是此天下一統之所由定也
又有若犁眉公之譚謀帷幄龍門子之文章金石關司
寇之經綸詹承旨之材識曾侍郎之儀禮劉秋卿之定
律蹇蹇六臣名垂竹帛至於尊居四輔貴擢三公丞相

秉鈞侯伯分封開黃扉兮參知政事輔青宮兮贊善大
夫兵寢刑措禮備樂和居民敷典執法分符其他戚里
姻聯藩封輔導或任都邑或掌學校夷邦奉使丘園高
蹈報國死忠事親全孝存歿光榮古今輝耀文德如是
此天下一統之所由治也夫武以戢禍亂文以綏太平
一代治功相須以成良由我聖祖剛健中正寬大英明
配以聖后端一靜貞儲君有象賢之器羣屑皆屏翰之
英堯仁天覆舜德地承巍巍不與蕩蕩無名所可見者

惟功業文章卓乎煥然之可稱觀其得國遠過於唐宋
行師名正於湯武申明五常世皆復古建官革宰相之
專列爵罷子男之數去神祇之濫封改先師之像塑祭
先王以御名待亡國以賓禮家法正而兵令嚴寺人安
而戚里妥至如訂先王之禮樂復前代之衣冠正韻書
之偏音除封禪之異端紀年號而不改寘符讖而不譚
無徽名尊號之稱頌無離宮別院之遊觀德政不陳於
大臣公侯不封以文職親軍不隸於王府藩王不伍於

百辟舊章不亂於聰明恤典不分於存歿兵不出於無
名姓不冒於繆錫避諱止於不偏陳言許以直入威重
典於豪強隆師道於勲戚是豈無自而然哉蓋其體道
謙冲立心恭默於昭不顯之天建用惟皇之極法文王
之卑服遵大禹之菲食本原之地純乎天德所以功高
萬古德冠百王非三代以後之君所能及也太宗奮興
燕邸為京洪熙宣德仁薰義蒸於穆睿皇不顯重明正
統天順乾覆坤承今我皇上握赤符王火德承乾運撫

璿極臯夔左輔稷契右弼都俞吁咈贊襄密勿總萬幾
以圖治登羣賢而效職孝隆至養允惟三后之尊儲建
元良茂行萬年之厯但見分野加詳郡縣加闢山河加
壯藩封加益外夷加化官制加立祀典加崇貢賦加溢
風俗加美基業加飾此成化萬億斯年之初生斯世者
何以報照臨之帝力真人乃凜然而驚肅然而起北面
望闕稽首再拜而言曰嗚呼盛哉先生之言博矣大矣
至矣盡矣筆而成書可以為史垂之後世可以觀累朝

之盛治矣

御定歷代賦彙卷三十五



總校官庶吉士臣張能照
校對官編修臣楊壽楠
謄錄監生臣莫漢